

依草野雉驚飛不過林齋沐暫思同靜室清羸已
覺助禪心寂寞日長誰問疾料君唯取古方尋

酬暢當高山尋道士見寄 前人

聞逐樵夫閒看棋忽逢人世是秦時開雲種玉嫌
山淺渡海傳書恠鶴遲陰洞石幢微有字古壇松
樹半無枝煩君遠示青囊錄願得相從一問師

酬李校書端甫見贈 唐司空曙

綠槐垂穗乳烏飛忽憶山中獨未歸青鏡流年看
髮變白雲芳草與心違乍逢酒客春遊慣久別林

僧夜坐稀昨日聞君到城闕莫將簪弁勝荷衣

酬張芬赦後見寄 前人

紫鳳朝銜五色書陽春忽布網羅除已將心變寒
灰後豈料先生腐草餘建水風煙收客淚杜陵花
竹夢郊居勞君故有詩相贈欲報瓊瑤愧不如

和鄭雙校內省眺矚思鄉懷友

唐楊炯

銅門初下辟石館始沉研遊霧千金字飛雲五色
箋樓臺橫紫極城闕俯青田暄入瑤房裏春迴玉

言宿
卷之十四
三十一
宇前霞文埋落照風物淡歸煙翰墨三餘隙關山
四望懸頽風睽酌羽流水曠鳴絃雖欣承白雪終
恨隔青天

和劉長史答十九兄

前人

帝堯平百姓高祖宅三秦子弟分河嶽衣冠動縉
紳盛名恒不隕歷代幾相因街巷塗山曲門閭洛
水濱五龍金作友一子玉為人寶劔豐城氣明珠
魏國珍風標自落落文質且彬彬共許刁元亮同
推周伯仁石城俯天闕鍾阜對江津驥足方遐騁

狼心獨未馴鼓鼙鳴九域風火集重圍城勢餘三
板兵威之四鄰居然混玉石直置保松筠耿介酬
天子危言數賊臣鍾儀琴未奏蘇武節猶新受祿
寧辭死揚名不顧身精誠動天地忠義感明神恠
烏俄垂翼脩蛇竟暴鱗來朝拜休命迷職下梁岷
善政馳金馬嘉聲繞玉輪三荆忽有贈四海更相
親宮徵諧鳴石光暉掩燭銀山川遙滿日零露坐
霑巾友愛光天下恩波浹後塵懦夫仰高節下里
繼陽春

和李明府

唐駱賓王

傳聞葉縣履飛向洛陽城馳道臨層掖津門對小
平霞殘疑製錦雲度似飄纓藻挾潘江徹塵虛范
甑清詎憐衝斗氣猶向匣中鳴

秋日山行簡梁大官

前人

乘馬陟層阜迴首睇山川攢峯銜宿霧疊巘架寒
烟百重含翠色一道落飛泉香吹分巖桂鮮雲抱
石蓮地偏心易遠致默體逾玄得性靈遊刃忘言
已弃筌彈冠勞巧拙結綬倦牽纏不如從四皓丘

中鳴一絃

酬田逸人遊巖見尋不遇題隱居里壁

唐陳子昂

遊人獻書去薄暮返靈臺傳道尋仙友青囊賣卜
來聞鶯忽相訪題鳳久裴徊石髓空盈握金經秘
不開還疑縫掖子復似洛陽才

和梁王衆傳張光祿是王子晉後身

唐崔融

聞有冲天客披雲下帝畿三年上賓去千載忽來

言宿
歸昔偶浮丘伯今同丁令威中郎才貌是柱史姓名非祇召趨龍闕承恩拜虎闈丹成金鼎獻酒至玉盃揮天仗分旄節朝容間羽衣舊壇無處所新廟坐光輝漢主存僂婁淮南愛道機朝朝縶氏鶴長向洛城飛

酬崔光祿冬日述懷贈答 唐張說

徐陳嘗竝作枚馬亦同時各負當朝譽俱承明主私夫君邁前侶觀國騁奇姿山似鳴威鳳泉如出寶龜才雄子雲筆學唐仲舒帷紫綬拂三寺朱門

臨九遠昔我含香日聯爾縉雲司朝攜蘭省步夕退竹林期中路一分手數載來何遲求友還相得羣英復在茲留臺少人務方駕遞尋追涉玩懷同賞霑芳憶共持迎賓南澗飲載妓東城嬉春郊綠畝秀秋澗白雲滋名畫披人物良書討滯疑興來先不惜歡往迹如遺歲晏罷行樂層城間所思夜魂燈處厭朝髮鏡前衰忽枉崔駟什兼流韋孟詞曲高彌寡和主善代爲師齊戒觀華玉留連歎色絲終慚起予者何足與言詩

酬故人還山

唐宋鼎

舉權乘春水歸山撫歲華碧潭宵見月紅樹晚開
花肅穆輕風度依微隱徑斜危亭暗松石幽澗落
雲霞思鳥鳴高樹遊魚戲淺沙安知餘興盡相望
紫煙賒

武司功初有幽庭春暄見詒夏首獲見以詩

報焉

唐張九齡

芳月盡離居幽懷重起予雖言春事晚尚想物華
初遲日暎方照高齋澹復虛筭成林向密花落樹
應疎贈鯉情無間求鶯思有餘暄妍不相待含歎
欲焉如

酬趙二侍御使西軍贈兩省舊寮之作

前人

石室先鳴者金門待制同操刀常願割持斧竟稱
雄應敵兵初起緣邊虜欲空使車經隴月征旆繞
河風忽枉兼金訊非徒秣馬功氣清蒲海曲聲滿
栢臺中顧已塵華省欣君震遠戎明時獨匪報嘗
欲退微躬

與袁補闕尋蔡拾遺會此公出行後蔡有五
韻詩見贈以此篇答焉 前人

轍迹陳家巷詩書孟子鄰偶來乘興者不值草玄
人契是忘年合情非累日申聞君還薄暮見眷及
茲晨贈我如瓊玖將何報所親

和左衛武倉曹衛中對雨創韻贈右衛李騎

曹二人同任校書

唐孫逖

林父同官意官尼久敬交文場刊玉篆武事掌金
鏡道合宜連茹時清豈繫匏克勤尋簿領多暇屏

謹饒美酒懷公讌玄談俟客嘲薄雲生北闕飛雨
自西郊院暑便清曠庭蕪覺漸苞高門闕詎閑逸
韻柱難膠枳棘鸞無歎椅梧鳳必巢忽聞徵竝作
觀海媿堂坳

同張明府碧谿贈答

唐孟浩然

別業聞新製同聲和者多還看碧谿答不羨綠珠
歌自有陽臺女朝朝拾翠過舞庭鋪錦繡妝牖閉
藤蘿秩滿休閒日春餘景色和仙鳥能作伴羅韞
共凌波別島尋花藥迴潭折芰荷更憐斜日照紅

言宿
粉艷青娥

江上答崔宣城

唐李白

太華三芙蓉明星玉女峯尋仙下西嶽陶令忽相逢
問我將何事湍波歷幾重貂裘非季子鶴鬣似王恭
謬忝燕臺召而陪鄒魏蹤水流知入海雲去或從龍
樹繞蘆洲月山鳴鵲鎮鐘還期如可訪台嶺陰長松

酬汴州李別駕見贈

唐祖詠

秋風多客思行旅厭艱辛自洛非才子遊梁得主
人文章叅末議榮賤豈同倫嘆逝逢三演懷賢憶四
真情因恩舊好契託死生親所愧能投贈清言益潤身

奉和張使君宴別加朝散

唐盧象

佐理星辰貴分榮渙汗深言從大夫後用答聖人
心騎擁軒裳客鸞驚翰墨林停杯歌麥秀秉燭醉
棠陰爽氣凌秋笛輕寒散冥砧祇因將四子講德
謝知音

奉酬睢陽路太守見貽之作

唐高適

盛才膺命代高價動良時帝簡登藩翰人和發詠
 思神仙出華省鸚鵡憶丹墀清淨能無事優游即
 賦詩江水紛想像雲物動萎蕤逸氣劉公幹玄言
 向子期多慚汲引速翻愧激昂遲相馬知何限登
 龍反自疑風塵吏道迫行邁旅心悲拙疾徒為爾
 窮愁欲問誰秋庭一片葉朝鏡數莖絲州縣甘無
 取丘園悔莫追瓊瑤生篋笥光景借茅茨他日青
 霄裏猶應訪所知

王閬州筵奉酬十一舅惜別之作

唐杜甫

萬壑樹聲滿千崖秋氣高浮舟出郡郭別酒寄江
 濤良會不復久此生何太勞窮愁但有骨羣盜尚
 如毛吾舅惜分手使君寒贈袍沙頭暮黃鶴失侶
 亦哀號

奉和嚴中丞西城晚眺十韻

前人

汲黯匡君切廉頗出將頻直詞才不世雄略動如

神政簡移風速詩清立意新層城臨媚景絕域望
餘春旗尾蛟龍會樓頭燕雀馴地平江動蜀天濶
樹浮秦帝念深分閩軍須遠筭緡花羅封蛺蝶瑞
錦送麒麟辭第輸高義觀圖憶古人征南多興緒
事業閭相親

酬別杜二

唐嚴武

獨逢堯典日再覩漢官時未効風霜勁空慚雨露
私夜鐘清萬戶曙漏拂千旗竝向殊庭謁俱承別
館追斗城憐舊路渦水惜歸期峯樹還相伴江雲
更對垂試回滄海權莫妬敬亭詩祇是書應寄無
忘酒共持但令心事在未肯鬢毛衰最悵巴山裏
清猿惱夢思

行營酬呂侍御

唐劉長卿

不敢淮南臥來趨漢將營受辭瞻左鉞扶疾拜前
旌井稅鶉衣樂壺漿鶴髮迎水歸餘斷岸烽至掩
孤城晚日當千騎秋風合五兵孔璋才素健早晚
檄書成

酬滁州李十六使君見贈 前人

滿鏡悲華髮空山寄此身白雲家自有黃卷業長
貧懶任垂竿老狂因釀黍春桃花迷聖代桂樹狎
幽人幢蓋方臨郡紫荊忝作鄰但愁千騎至石路
却生塵

奉和宣城張太守南亭秋夕懷友

唐錢起

池館蟬蛩聲梧桐秋雨路晴月臨朱戟靜河近畫樓
明卷幔浮涼入聞鐘亦小夜清片雲懸曙斗數鴈過
秋城羽扇揚風暇瑶琴今悵別情江山飛麗藻謝朓

讓詩名

答靳博士

唐張九齡

上苑春先入中園花盡開唯餘幽徑草尚待日光
催

答友人贈烏紗帽

唐李白

領得烏紗帽全勝白接羅山人不照鏡稚子道相
宜

答裴迪輞川遇雨憶終南山之作

唐王維

外 森森寒流廣蒼蒼秋雨晦君問終南山心知白雲

答武陵田太守

唐王昌齡

仗劍行千里微軀敢一言曾爲大梁客不負信陵恩

答鄭十七郎一絕

唐杜甫

時 雨後過畦潤花殘步屨遲把文驚鳥小陸好客見當

答李瀚三首

唐韋應物

秋 孤客逢春暮緘情寄舊遊海隅人使遠書到洛陽

秋

馬卿猶有壁漁父自無家想子今何處扁舟隱荻

花

還 林中觀易罷溪上對鷗閒楚俗饒辭客何人最往

答韋蘇州

唐丘丹

月 露滴梧葉鳴秋風桂花發中有學仙人吹簫弄山

答嚴大夫

唐賈至

今夕秦天一鴈來
梧桐墜葉擣衣催
思君獨步華庭月
舊館秋陰生綠苔

中丞嚴公雨中垂寄見憶一絕奉答

唐杜甫

何日雨晴雲出溪
白沙青石洗無泥
只須伐竹開荒徑
拄杖穿花聽馬嘶

酬李穆見寄

唐劉長卿

孤舟相訪至天涯
萬轉雲山路更賒
欲掃柴門迎

遠客青苔黃葉滿
貧家

酬柳郎中春日歸揚州南國見別之作

唐韋應物

廣陵三月花正開
花裏逢君醉一回
南北相過殊不遠
暮潮歸去早潮來

酬張繼

唐皇甫冉

悵望南徐登北固
迢迢西塞望東關
落日臨川問音信
寒潮惟帶夕陽還

對月答元明府

唐戴叔倫

山下孤城月上遲相留一醉本無期明年此夕遊
何處縱有清光知對誰

和令狐相公別牡丹

唐劉禹錫

平章宅裏一闌花臨到開時不在家莫道兩京非
遠別春明門外卽天涯

浩初上人見貽絕句欲登仙人山因以調之

唐柳宗元

珠樹玲瓏隔翠微病來方外事多違仙山不屬分
符客一任凌空錫杖飛

酬曹侍御過象縣見寄

前人

破額山前碧玉流騷人遙駐木蘭舟春光無限瀟
湘意欲采蘋花不自由

和練秀才楊柳

唐楊巨源

水邊楊柳綠煙絲立馬煩君折一枝惟有春風最
相惜慙勤更向手中吹

和孫明府懷舊山

唐雍陶

五柳先生本在山偶然爲客落人間秋來見月多
歸思自起開籠放白鷗

茗谿洲梁耿別後見寄

唐劉長卿

清川永路何極落日孤舟解攜鳥向平蕪遠近人
隨流水東西白雲千里萬里明月前谿後谿惆悵
長沙謫去江潭芳草萋萋

袁 擢楷書

古自寵校刊

張 贇督刊

詩宿卷之十四終

詩宿卷之十五

奎集

長山劉一相彙輯 男鴻訓鴻範鴻采叅閱

章丘木良知

稷山梁蕙 鄭寅校次

關中何補之 來臨訂正

行邁部

奉使類

北使至洛 節文

宋顏延之

振楫發吳州 秣馬陵楚山 塗出梁宋郊 道由周鄭

NATIONAL CENTRAL LIBRARY, TAIWAN, R.O.C.

間前登陽城路旦夕望三川伊澗絕津濟臺館無
尺椽宮陛多巢穴城闕生雲煙

權歌行

宋吳邁遠

十三為漢使孤劔出臯蘭西南窮天險東北畢地
關岷山高以峻燕水清且寒一去千里孤邊馬何
時還遙望煙嶂外瘴氣鬱雲端始知身死處平生
從此殘

奉使以益州至長安發鍾陽驛

唐盧照鄰

躋險方未夷乘春聊騁望落花赴丹谷奔流下青
嶂歲蕤曉樹滋澁澆春江漲平川看釣侶狹逕聞
樵唱蝶戲綠苔前鶯歌白雲上耳目多異賞風煙
有奇狀峻阻將長城高標吞巨舫聯翩事羈勒辛
苦勞疲恙夕濟幾潺湲晨登每惆悵誰念復芻狗
山河獨偏喪

安輯嶺表事平罷歸

唐李嶠

雲端想京縣帝鄉如可見天涯望月臺海路幾悠
哉六月飛鵬去三年瑞雉來境遙銅柱出山險石

詩宿 卷之十五 二
門開自我違 灑洛瞻途屢 揮霍朝朝寒 露多夜夜
征衣薄 白簡承朝憲 朱方撫夷落 既弘天覆廣 且
諭皇恩博 皇恩溢外區 憬俗詠來蘇 聲朝臣天子
壇場拜老夫 絳宮韜將略 黃石寢兵符 返旆收龍
虎 空營集鳥鳥 日落澄氛靄 憑高視衿帶 東甌抗
於越南斗 臨吳會 春色遶邊陲 飛花出荒外 卉服
紛如積 長川思遊客 風生丹桂晚 雲起蒼梧夕 去
軸艤清江 歸軒趨紫陌 衣裳會百蠻 瑛賚委重關
不學金刀使 空持寶劍還

使至塞上

唐王維

單車欲問邊 屬國過居延 征蓬出漢塞 歸鴈入胡
天 大漠孤煙直 長河落日圓 蕭關逢候騎 都護在
燕然

使青夷軍入居庸

唐高適

匹馬行將夕 征途去轉難 不知邊地別 祇訝客衣
單 溪冷泉聲苦 山空木葉乾 莫言關塞極 雨雪尚
漫漫

使還至菱陂驛渡澗水作

唐劉長卿

詩宿 李集卷之十五 三
清川已再涉疲馬共西還何事行人倦終年流水
閒孤煙飛廣澤一鳥向空山愁入雲峰裏蒼茫閉
古關

移使鄂州次峴陽館懷舊居 前人

多慙恩未報敢問路何長萬里通秋鴈千峰共夕
陽舊遊成遠道此去更迷鄉草露空山裏朝朝滿
客裳

遠使海曲春夜多懷

唐駱賓王

長嘯三春晚端居百慮盈未安蝴蝶夢遽切曾禽
情別島連寰海離魂斷戍城流星疑伴使明月似
依營懷祿寧期達牽時匪徇名艱虞行已遠時迹
自相驚

奉使巡檢兩京路種果樹事畢入秦因詠歌

唐鄭審

聖德周天壤韶華滿帝畿九重承渙汗千里樹芳
菲陝塞餘陰薄關河舊色微發生和氣動封植衆
心歸春露條應弱秋霜果定肥影移行子蓋香撲
使臣衣入逕迷馳道分行接禁闈何當扈仙蹕攀

折奉恩輝

奉使鄂渚至烏江道中

唐劉長卿

滄洲不復戀漁竿
白髮那堪帶鐵冠
客路向南何處是
蘆花千里雪漫漫

傳舍類

勞勞亭歌

唐李白

金陵勞勞送客堂
蔓草離離生道傍
古情不盡東流水
此地悲風愁白楊
我乘素舸同康樂
朗詠清川飛夜霜
昔聞牛渚吟五章
今來何謝袁家郎
苦

竹寒聲動秋月獨宿空簾歸夢長

題大庾嶺北驛

唐宋之問

陽月南飛鴈傳聞至此迴
我行殊未已何日復歸來
江靜潮初落林昏瘴不開
明朝望鄉處應見隴頭梅

還至端州驛前與高六別處

唐張說

舊館分江口凄然望落暉
相逢傳旅食臨別換征衣
昔記山川是今傷人代
非往來皆此路生死不

詩宿
同歸

深渡驛

前人

旅宿青山夜荒庭白露秋洞房懸月影高枕聽江
流猿響寒巖樹螢飛古驛樓他鄉對搖落併覺起
離憂

移居公安山館

唐杜甫

南國晝多霧北風天正寒路危行木杪身遠宿雲
端山鬼吹燈滅廚人語夜闌雞鳴問前館世亂敢
求安

晚行次苦竹館却憶于越舊遊

唐劉長卿

疋馬風塵色千峰日暮時逢看落日盡獨向遠山
遲故驛花臨道芳村竹映籬誰憐却回首步步戀
南枝

北歸次秋浦界清溪館

前人

萬嶺猿頰斷孤村客暫依鴈過彭蠡暮人向宛陵
稀舊路青山在餘生白首歸漸知行近北不見鷓
鴒飛

晚次宿預館

唐錢起

鄉心不可問秋氣又相逢飄泊方千里離悲復幾
重迴雲隨去鴈寒露滴鳴蛩延頸遙天末如聞故
國鐘

雲陽館與韓卿紳宿別

唐司空曙

故人江海別幾度隔山川乍見翻疑夢相悲各問
羊孤燈寒照雨深竹暗浮煙更有明朝恨離杯惜
共傳

題松汀驛

唐張祐

山色遠含空雲倉茫驛國東海明先見日江白迴聞
風鳥道高原去人煙小逕通那知舊遺逸不在五
湖中

候使石頭驛樓

唐張九齡

山檻憑高望川途眇北流遠林天翠合前浦日華
浮萬井緣津渚千艘咽渡頭漁商多末事畊稼少
良疇自守陳蕃榻常登王粲樓徒然騁目處豈是
獲心遊向跡雖愚谷求名亦盜丘息陰芳木所空
復越鄉憂

宿洞口館

唐錢起

野竹通谿冷秋泉入戶鳴
亂來人不到寒草上塔生

嘉陵驛

唐武元衡

悠悠風旆遶山川山驛空濛雨作煙
路半嘉陵頭已白蜀門西更上青天

宿疎陂驛

唐王周

秋染棠梨葉半紅荊州東望草平空
誰知孤宦天涯意微雨蕭蕭古驛中

紀行類

苦寒行

魏武帝

北上太行山艱哉何巍巍羊腸阪詰屈車輪為之摧
樹木何蕭瑟北風聲正悲熊羆對我蹲虎豹夾路蹄谿谷
少人民雪落何霏霏延頸長歎息遠行多所懷我心何怫鬱
思欲一東歸水深橋梁絕中路正徘徊迷惑失故路薄暮無
宿棲行行日已遠人馬同時饑擔囊行取薪斧冰持作糜悲
彼東山詩悠悠使我哀

黎陽作

魏文帝

千騎隨風靡萬騎正龍驤金鼓震上下千戚紛縱
橫白旄若素霓丹旗發朱光追思太王德胥宇誠
足臧經歷萬歲林行行到黎陽

還都帆

晉成公綏

洋洋熊耳流巍巍伊闕山高岡碣崔嵬雙阜夾長
川素石何磷磷水禽何翩翩遠涉許潁路顧思邈
綿綿鬱陶懷所親引領情緬然

赴洛道中作二首

晉陸機

總轡登長路嗚咽辭密親借問子何之世網嬰我
身未嘆遵北渚遺思結南津行行遂已遠野途曠
無人山澤紛紆餘林薄杳阡眠虎嘯深谷底鷄鳴
高樹巔哀風中夜流孤獸更我前悲情觸物感沈
思鬱纏綿佇立望故鄉顧影悽自憐

遠遊越山川山川脩且廣振策陟崇丘安轡遵平
莽夕息抱影寐朝徂銜思往頓轡倚萬巖側聽悲
風響清露墜素輝明月一何朗撫枕不能寐振衣
獨長想

赴洛

前人

希世無高符營道無烈心靖端肅有命假楫越江
潭親友贈予邁揮淚廣川陰撫膺解攜手永歎結
遺音無跡有所匿寂寞聲必沈肆目眇不及緬然
若雙潛南望泣玄渚北邁涉長林谷風拂脩薄油
雲翳高岑疊疊孤獸騁嚶嚶思鳥吟感物戀堂室
離思一何深佇立慨我歎寤寐涕盈衿惜無懷歸
志辛苦誰為心

苦寒行

前人

北游幽朔城涼野多嶮艱俯入穹谷底仰陟高山
盤凝冰結重礪積雪被長巒陰雲興巖側悲風鳴
樹端不覩白日景但聞寒鳥嚙猛虎憑林嘯玄猿
臨岸歎夕宿喬木下慘愴怕鮮歡渴飲堅冰漿饑
待零露餐離思固已矣寤寐莫與言劇哉行役人
慊慊怕苦寒

經過渦路

晉李顥

言歸越東足逝將反上都後洹填中路改轍脩茲
衢旦發石亭境夕宿桑首墟勁火炊不興潤零雨莫

能濡亢陽彌十旬涓滴未暫舒泉流成平陸結駟
可迴車輦允相忘鱗翻為涸池魚咫尺不能移白
日奄桑榆

還都帆

晉湛方生

高岳萬丈峻長湖千里清白沙窮年潔林松冬夏
青水無暫停流木有千載貞寤言賦新詩忽忘羈
客情

帆入南湖

前人

彭蠡紀三江廬岳主衆阜白沙靜川路青松蔚巖
首此水何時流此山何時有人運互推遷茲器獨
長久悠悠宇宙中古今迭先後

濟曲阿後湖

宋孝武帝

宵登毗陵路旦過雲陽郭平湖曠津濟菰渚迭明
蕪和風翼歸采夕氛晦山嶠驚蘭翻魚藻頽霞照
桑榆

還至梁城作

宋顏延之

眇默軌路長憔悴征戍勤昔邁先祖師今來後歸
軍振策睠東路傾側不羣息徒顧將夕極望梁

詩宿 奎集卷之十五 十一
陳分故國多喬木空城凝寒雲丘隴填郭郭銘誌
滅無文木石局幽閨黍苗延高墳惟彼雍門子吁
嗟孟嘗君愚賤同堙滅尊貴誰獨聞曷爲久遊客
憂念坐自殷

自潯陽至都集道里名爲詩 宋謝莊

山經亟旋覽水滌勸敷尋稽謝成淹留煙臺信遐
臨翔州凝寒氣秋浦結清陰眇眇高湖曠遙遙南
陵深青溪如委黛黃沙似舒金觀道雷池側訪德
茅堂陰魯顯闕微迹秦良滅芳音訊遠博望崖採
賦梁山岑崇館非陳宇茂苑豈舊林

倣古節文

宋袁淑

評此倦遊士本家自遼東昔隸李將軍十載事西
戎結車高闕下極望見雲中四面各千里從橫起
嚴風夕寐北河陰夢還甘泉宮勤役未云已壯年
徒爲空廼知古時人所以悲轉蓬

入彭蠡湖口

前人

客遊倦水宿風潮難具論洲島驟迴合圻岸屢崩
奔乘月聽哀狔浥露馥芳蓀春晚綠野秀巖高白

雲屯千念集日夜萬感盈朝昏攀崖照石鏡牽葉
入松門三江事多往九派理空存靈物去珍惟異
人祕精魂金膏滅明光水碧綴流溫徒作千里曲
絃絕念彌敦

初發石首城

前人

白珪尚可磨斯言易為緇雖抱中孚文猶勞貝錦
詩寸心若不亮微命察如絲日月垂光景成貸遂
兼茲出宿薄京畿豐衣裝博會颺重經平生別再與
朋知辭故山日已遠心風波豈還時迢迢萬里帆茫
茫終何之遊當羅浮行息必廬霍期越海陵三山
遊湘歷九嶷欽聖若旦晷懷賢亦悽其皎皎明發
心不為歲寒欺

七里瀨

前人

羈心積秋晨晨積展遊眺孤客傷逝湍徒旅苦奔
峭石淺水潺湲日落山照曜荒林紛沃若哀禽相
叫嘯遭物悼遷斥存期得要妙既秉上皇心豈屑
末代誚目覩嚴子瀨想屬任公釣誰謂古來殊異
代可同調

上潯陽還都道中作

宋鮑照

昨夜宿南陵今日入蘆洲客行惜日月崩波不可
留侵星赴早路畢景逐前儔鱗鱗夕雲起獵獵晚
風遒騰沙鬱黃霧翻浪揚白鷗登艫眺淮甸掩泣
望荆流絕目盡平原時見遠煙浮倏忽坐還合俄
思甚兼秋未嘗違戶庭安能千里遊誰令乏古節
貽此越鄉憂

還都至三山望石頭城

前人

泉源安首流川末澄遠波晨光被水族曉氣歇林
阿兩江皎平迴三山鬱駢羅南帆望越嶠北榜指
齊河關肩繞天色際帶抱尊華長城非壑嶮峻岨
似荆芽攢樓貫白日檣堞隱丹霞征夫喜觀國遊
子遲見家流連入京引躑躅望鄉歌彌前歎景促
逾近勸路多偕萃猶如茲弘易將謂何

襄陽樂

宋無名氏

朝發襄陽城暮至大堤宿大堤諸女兒花艷驚馬郎
目

之宣城郡出新林浦向板橋

齊謝朓

江路西南永歸流東北鶩天際識歸舟雲中辨江
樹旅思倦搖搖孤遊昔已屢旣歡懷祿情復協滄
洲趣囂塵自茲隔賞心於此遇雖無玄豹姿終隱
南山霧

休沐重還丹陽道中

前人

薄遊第從告思間願罷歸還叩歌賦似休汝車騎
非灞池不可別伊川難重違汀葭稍靡靡江莢復
依依田鵠遠相叫沙鶉忽爭飛雲端楚山見林表

吳岫微試與征徒望鄉淚盡沾衣賴此盈樽酌含
景望芳菲問我勞何事霑沐仰清徽志狹輕軒冕
恩甚戀閨闈歲華春有酒初服偃郊扉

上湘度琵琶磯

齊劉楨

茲山挺異萼孤起秀雲中陂池激楚浪紛紜絕宛
風煙峯晦如畫寒水清若空頡頏鷗舞白流亂葉
飛紅

早發青林

齊孔稚珪

孤征越清江遊子悲路長二旬倏已滿三千眇未

言宿 奎集卷之十五 十五
央草雜今古色巖留冬夏霜寄懷中山舊舉酒莫
相忘

早發龍巢

梁元帝

征人喜放溜曉發晨陽隈初言前浦舍定覺近洲
開不疑行舫動唯看遠樹來還瞻起漲岸稍隱陽
雲臺

長歌行 節文

梁沈約

連連丘壑改微微市朝變局塗頓遠策留歡恨奔
箭春貌既移紅秋林豈停倩一倍茂陵道寧思栢

梁宴長戢兔園情未別金華殿

早發定山

前人

夙齡愛遠壑晚涖見奇山標峯綵虹外置嶺白雲
間傾壁忽斜豎絕頂復孤圓歸海流漫漫出浦水
濺濺野棠開未落山櫻發欲然忘歸屬蘭杜懷祿
寄芳荃眷言採三秀徘徊望九仙

早發漁浦潭

梁丘遲

漁潭霧未開赤亭風已颺權歌發中流鳴鞞響香
障村童忽相聚野老時一望詭恠石異象蘄絕峯

詩宿 奎集卷之十五 十六
殊狀森森荒樹齊
析析寒沙漲藤垂
島易陟崖傾嶼難傍
信是求幽棲豈徒暫
清曠坐嘯昔有委臥
治今可尚

至牛渚憶魏少英

梁王僧孺

楓林暖似畫沙岸靜如掃
空籠望玄石迴斜見危
島綠草間遊蜂青霞集
輕鵝徘徊洞初月侵浮瀆
春滂非願歲物華徒用風光好

度連圻

節文

梁何遜

客子行行倦年光處處華
石蒲生促節巖樹落高

花

初發新林

前人

伊昔負薪暇慕義遊梁楚
短翮忘連翮追飛散容
與優游沐道教漸漬淹寒暑
大德本無酬輕生竊
自許舟歸屬海運風積如鵬舉
浮水暗舟艫合岸
喧徒侶凜凜窮秋暮初寒入洲渚
鏡吹響清江懸
旗出長嶼危檣迴不進
沓浪高難拒回首泣親賓
中天望宛許帝城猶隱約
家園無處所去矣方悠
悠含意將何語

江州還入石頭

梁劉峻

鼓柁浮大川延睇洛城觀洛城何鬱鬱香與雲霄
 半前望蒼龍門斜瞻白鶴館槐垂御溝道柳綴金
 隄岸迅馬晨風趨輕輿流水散高唱梁塵下湘瑟
 翔禽亂我思江海遊曾無朝市玩忽寄靈臺宿空
 軫及關歎仲子入南楚伯鸞出東漢何能栖樹枝
 取斃王孫彈

帆渡吉陽洲

梁劉孝儀

揚帆乘浪華慘鼓要風力近樹儵而遐遙山俄已

逼欲比驚龍掣將頓陽鳥翼客行悲道遠唯須前
 路極

又

梁劉孝威

江風凌曉急鉦鼓候晨催幸息榜人唱聊望高帆
 開聯村倏忽盡循汀俄頃回疑是傍洲退似覺前
 山來將與圖南競誰云勞沂泗

江行

梁江洪

日沒風光靜遠山深無雲潮落晚洲出浪罷沙成
 文挾琴上高岸望月彈明君去家未千里斷絕怨

詩宿
離羣

胡笳曲

前人

落日慘無光臨河獨飲馬颼颼夕風高聯翩飛鴈
下

晚出新亭

陳陰鏗

大江一浩蕩離悲足幾重潮落猶如蓋雲昏不作
峯遠戍唯聞鼓寒山但見松九十方稱半歸途詎
有蹤

渡青草湖

前人

洞庭春溜滿平湖錦帆張沅水桃花色湘流杜若
香穴去茅山近江連巫峽長帶天澄迴碧映日動
浮光行舟逗遠樹度鳥息危檣滔滔不可測一葦
詎能航

并州羊腸坂

陳江總

三春別帝鄉五月度羊腸本畏車輪折翻嗟馬骨
傷驚風起朔鴈落照盡胡桑關山定何許徒御慘
悲涼

汎宮亭湖

陳劉刪

言宿
卷之十五
十九
迴艫乘派水舉帆逐分風澆瀆疑無際飄揚似度
空檣烏排鳥路船影沒河宮孤石滄波裏匡山苦
霧中寄言千金子安知萬里逢

從周入齊夜度砥柱

北齊顏之推

俠客重艱辛夜出小平津馬色迷關吏雞鳴起戍
人露鮮華劍彩月照寶刀新問我將何去北海就
孫賓

入關絕句

隋虞茂

隴雲低不散黃河咽復流關山多道里相接幾重

愁

晚渡江津

唐李百藥

寂寂江山晚蒼蒼原野暮秋氣懷易悲長波淼難
泝索索風葉下離離早鴻度立壑列夕陰葭莢凝
寒霧日落亭高遠獨此懷歸暮

渡漢江

前人

東流旣瀾瀾南紀信滔滔水激沈碑岸波駭弄珠
臯含星映淺石浮蓋下奔濤溜闊霞光近川長曉
氣高檣烏轉輕翼戲鳥落風毛客心旣多緒長歌

言宿
且代勞

早發成臯望河

唐劉孝孫

清晨發嚴邑驅馬走輾轅迴瞰黃河上愴怳屢飛
魂鴻流導積石驚浪下龍門仙槎不辨處沉璧想
猶存遠近洲渚出颯沓鳧鴈喧懷古空延佇歎逝
將何言

早渡分水嶺

唐盧照鄰

丁年遊蜀道斑鬢向長安徒費周王粟空彈漢吏
冠馬蹄穿欲盡貂裘敝轉寒層冰橫九折積石凌
七盤重谿旣下漱峻峯亦上千隴頭聞戍鼓嶺外
咽飛湍瑟瑟松風急蒼蒼山月團傳語後來者斯
路誠獨難

早發苦竹館

唐李嶠

合沓巖嶂深朦朧煙霧曉荒阡下樵客野猿驚山
鳥開門聽潺湲入徑尋窈窕棲巖抱寒木流螢飛
暗篠早霧稍霏霏殘月猶皎皎行看遠星稀漸覺
遊氛少我行撫輶傳兼得傍林沼貪翫水石奇不
知川路渺徒憐野心曠詎測浮羊小方解寵辱情

詩宿
奎集卷之十五
二十一
永託累塵表

初至崖口

唐宋之間

崖口衆山斷嶽峯聳天壁氣衝落日紅影入春潭
碧錦續織苔蘚丹青畫松石水禽泛容輿巖花飛
的皪微路從此深我來恨于役惆悵情未已羣峯
暗將夕

入崖口五渡寄李適

前人

抱琴登絕壑伐木泝清川路極意未盡勢迴趣轉
綿人遠草木秀山深雲景鮮余負海嶠情自昔微

尚然彌曠十餘載今來宛仍前未窺仙源極獨進
野人船時攀乳竇憩屢薄天窗眠夜絃響松月朝
楫弄苔泉因冥象外理永謝區中緣碧潭可遺老
丹砂堪學仙莫使馳光暮空令歸鶴憐

經廬岳迴望江州想洛陽有作

唐劉允濟

龜山帝始營龍門禹初鑿出入經變化俯仰憑寥
廓未若茲山功連延竝巫霍東北流艮象西南距
坤絡宏阜自鬱鬱盤高堙復迴薄勢入柴桑渚陰開

彭蠡壑九江杳無際七澤紛相錯雲雨散吳會風
波騰鄒郛跡隨造化久利與乾坤博盼鄉里精氣通
紛綸潛恠作石渠忽見踐金房安可託地入天子
都巖有仙人藥二門幾迢遞三宮何儵爚咫尺窮
杳冥跬步皆恬漠才驚羽翰幽居靜龍蛇蠖明牧
振雄詞棣華殊灼灼盛業匡西夏深謀贊禹亳黃
雲覆鼎飛絳氣橫川躍佐曆符賢運人期茂天爵
禮樂富垂髻詩書成舞勺清輝靖函電利器騰霜
鏐遊聖挹衢樽鄰畿忝木鐸牆仞包武侯波瀾控

文若旋聞刈薪楚遽覩折葵藿稷尚序揆圖良平
公輔略重臣資出守英藩諒求瘼豫章觀偉材江
州訪靈嶧陽岫曉氛氤陰崖暮蕭索潛伏屢鯨奔
雄飛更鷲搏驚徧透煙霞騰猿亂枝格故園有歸
夢他山非行樂帝鄉徒可遊湟澗終旅泊景物觀
淮海雲霄望河洛城闕紫微星圖書玄扈閣神功
多粉績元氣猶斟酌丞相下南宮將軍趨北落橫
簪竝附蟬列鼎俱調鶴四郊時迷路五月先投禽
池榭宣瓊管風花亂珠箔舊遊勞夢寐新知無悅

樂天寒欲贈言歲暮期交約夜琴清玉柱秋灰變
 緹幕風雲動翰林宮徵調文齋言泉激為浪思緒
 飛成繳千里輝珠璣五采含丹雘鐘鼓旋驚鷄瑾
 瑜俄抵鵲竊價慙庸急叨聲逾寂寞長望限南溟
 居然翳東郭

宣城青溪二首

唐李白

青溪清我心水色異諸水借問新安江見底何如
 此人行明鏡中鳥度屏風裏向晚猩猩啼空悲遠
 遊子

青溪勝桐廬水木有佳色山貌日高古石容天傾
 側綵鳥昔未名白猿初相識不見同懷人對之空
 歎息

早過漆林渡寄萬巨

前人

西經大藍山南來漆林渡水色倒空青林煙橫積
 素漏流若吞翁沓浪競奔注潭落天上星龍開水
 中霧巉巖注公柵突兀陳焦墓嶺峭紛上千川明
 屢回顧因思萬夫子解渴同瓊樹何日覩清光相
 歡詠佳句

江行寄崔員外

前人

飄飄江風起蕭颯海樹秋登艫美清夜挂席移輕
舟月隨碧山轉水合清天流杳如星火上但覺雲
林幽歸路方浩浩徂川去悠悠徒悲蕙草歇復聽
菱歌愁岸曲迷後浦沙明瞰前洲懷君不可見望
遠增離憂

早發交崖山還太室作

唐崔曙

東林氣微白寒鳥急高翔吾亦自茲去北山歸草
堂杪冬正三五日月遙相望肅肅過潁上朧朧辨
夕陽川冰生積雪野火出枯桑獨往路難盡窮陰
人易傷傷此無衣客如何營承雨霜

夜到洛口入黃河

唐儲光羲

河洲多青草朝暮增客愁客愁惜朝暮枉渚暫停
舟中宵大川靜解纜逐歸流浦澈既清曠沿洄非
阻脩登艫望落月擊汰悲新秋儻遇乘槎客未言
星漢游

過華陰

唐王昌齡

雲起太華山雲山互明滅東峯始含景了了見松

雪羈人感幽栖宿映轉奇絕欣然忘所疲永望吟
不輟信宿百餘里出關玩新月何意昨冥冥遇物
遂遷別人生屢如此何以肆愉悅

登隴

唐高適

隴頭遠行客隴上分流水流水無盡期行人未云
已淺才登一命孤劔通萬里豈不思故鄉從來感
知己

暮秋山行

唐岑參

疲馬卧長坂夕陽下通津山峯吹空林颯颯如有
人蒼旻霽涼雨石路無飛塵千念集暮節萬籟悲
蕭晨鷓鴣昨夜鳴蕙草色已陳况在遠行客自然
多苦辛

早上五盤嶺

前人

平旦驅馬曠然出五盤江回兩崖闢日隱羣峯
攢蒼翠煙景曙森沉雲樹寒松疎露孤驛花密藏
回灘棧道溪雨滑畬田原草乾此行為知己不覺
蜀道難

積草嶺

唐杜甫

詩宿 卷之十五 二十六
連峯積長陰白日遞隱見颼颼林響交慘慘石狀
變山分積草嶺路異明水縣旅泊吾道窮衰年歲
時倦卜居尚百里休駕投諸彥邑有佳主人情如
已會面來書語絕妙遠客驚深眷食糜不願餘茅
茨眼中見

寒峽

前人

行邁日悄悄山谷勢多端雲門轉絕岸積阻霾天
寒寒峽不可度我實衣裳單况當仲冬交泝洽增
波瀾野人尋煙語行子傍水飡此生免荷爰未敢

辭路難

白沙渡

前人

畏途隨長江渡口下絕岸差池上舟楫杳窅入雲
漢天寒荒野外日莫中流半我馬向北嘶山後飲
相喚水清石礚礚沙白灘漫漫迴然洗愁辛多病
一踈散高壁抵欽岑洪濤越凌亂臨風獨回首覽
轡復三嘆

水會渡

前人

山行有常程中夜尚未安微月沒已久崖傾路何

難大江動我前洶若溟渤寬篙師暗理楫歌笑輕
波瀾霜濃木石滑風急手足寒入舟已千憂陟巘
仍萬盤回眺積水外始知衆星乾遠遊令人瘦衰
疾慙加食

石龕

前人

熊羆咆我東虎豹號我西我後鬼長嘯我前猱又
啼天寒昏無日山遠道路迷驅車石龕下仲冬見
虹霓伐竹者誰子悲歌上雲梯爲官采美箭五歲
供梁齊苦云直幹盡無以充提攜奈何漁陽騎颯

颯驚承黎

發閬中

前人

前有毒蛇後猛虎溪行盡日無村塢江風蕭蕭雲
拂地山木慘慘天欲雨女病妻憂歸意速秋花錦
石誰能數別家三月一得書僻地何時免愁苦

易陽早發

唐王勃

飭裝侵曉月奔策候殘星危閣尋丹嶂迴梁屬翠
屏雲間迷樹影霧裏失峯形復此涼颼至空山飛
夜螢

麻平晚行

前人

百年懷土望千里倦遊情高低尋戍道遠近聽泉聲
礮葉纔分色山花不辨名羈心何處盡風急暮猿清

入秦川界

唐盧照鄰

隴坂長無極蒼山望不窮石徑縈疑斷回流映似空
花開綠野霧鶯轉紫巖風春芳勿遽盡留賞故人同

渡瓜步江

唐駱賓王

捧檄辭幽逕鳴榔下遺洲驚濤疑躍馬積氣似連牛
月迴寒沙淨風急夜江秋不學浮雲影他鄉空滯留

經行嵐州

唐杜審言

北地春光晚邊城氣候寒往來花不發新舊雪仍殘
水作琴中聽山疑畫裏看自驚牽遠役艱險促征鞍

早發平昌島

唐沈佺期

解纜春風後鳴榔曉漲前陽鳥出海樹雲鴈下江

煙積氣衝長島浮光溢大川不能懷魏闕心賞獨
冷然

過蠻洞

唐宋之間

越嶺千重合蠻溪十里斜竹迷樵子徑萍匝釣人
家林暗交楓葉園香覆橘花誰憐在荒外孤賞足
雲霞

次蘇州

唐李义

洛渚問吳潮吳門想洛橋夕煙楊柳岸春水木蘭
橈城邑南樓近星辰北斗遙無因生羽翼輕舉託

還廳

曉發方騫驛

唐蘇頌

傳至遠山蹊龍鍾蹴澗泥片陰時作雨微照已生
霓鬢髮愁氛換心情險路迷方知向蜀老偏識子
規啼

曉發

唐賀知章

江臯聞曙鐘輕棹理還舸海潮夜約約川露晨溶
溶始見沙上鳥猶埋雲外峯故鄉杳無際明發懷
朋從

赴使瀧峽

唐張九齡

谿路日幽深，寒空入兩嶽。
霜清百丈水，風落萬重林。
夕鳥聯歸翼，秋猿斷去心。
別離多遠思，况乃歲方陰。

耒陽溪夜行

前人

乘夕棹歸舟，緣源路轉幽。
月明看嶺樹，風靜聽溪流。
嵐氣船間入，霜華衣上浮。
猿聲雖此夜，不是別家愁。

自豫章南還江上作

前人

歸去南江水，磷磷見底清。
轉逢空闊處，聊洗滯留情。
浦樹遙如待，江鷗近若迎。
津途別有趣，况乃濯吾纓。

下京口埭夜行

唐孫逖

孤帆度綠氛，寒浦落紅曛。
江樹朝來出，吳歌夜漸聞。
南溟接潮水，北斗近鄉雲。
行役從茲去，歸情入鴈羣。

夜到潤州

前人

夜入丹陽郡，天高氣象秋。
海隅雲漢轉，江畔火星

言宿
卷之十五
三十一
流城郭傳金柝閭閻閉綠洲客行凡幾夜新月再
如鉤

夜渡湘水

唐孟浩然

客舟貪利涉夜裏渡湘川露氣聞芳杜歌聲識采
蓮榜人投岸火漁子宿潭煙行侶時相問潯陽何
處邊

夕次蔡陽館

前人

日暮馬行疾城荒人住稀聽歌知近楚投館忽如
歸魯堰田疇廣章陵氣色微明朝拜嘉慶須著老

萊衣

晚入汴河

唐崔顥

昨晚南行楚今朝北汴河客愁能幾日鄉路漸無
多晴景搖津樹春風起棹歌長淮亦已盡寧復畏
潮波

晚發五渡

唐岑參

客厭巴南地鄉鄰劔北天江村片雨外野寺夕陽
邊芊葉藏山逕蘆花間渚田舟行未可住乘月且
須牽

過洞庭湖

唐杜甫

鮫室圍青草龍堆隱白沙護堤盤古木迎棹舞神
鴉破浪南風正回檣畏日斜湖光與天遠直欲泛
仙槎

舟行早發

唐張軫

夜帆時未發同侶暗相催山曉月初下江鳴潮欲
來稍分揚子岸不辨越王臺自客水鄉裏舟行知
幾迴

晚至華陰

唐皇甫曾

臘盡促歸心行人及華陰雲霞仙掌出松柏古祠
深野渡冰生岸寒川燒隔林溫泉看漸近宮樹晚
沉沉

玉山嶺上作

前人

悠悠驅疋馬征路上連岡晚翠深雲竇寒苔淨石
梁荻花偏似雪楓葉不禁霜愁見前程遠空郊下
夕陽

過柳州

唐戴叔倫

地盡江南戍山分桂北林火雲三月合石路九疑

言宿
深暗谷隨風過危橋共鳥尋羈魂已愁絕不復待
猿吟

江行次武昌縣

唐盧綸

家寄五湖間扁舟往復還年年生白髮處處上青山
去國空知遠安身竟不閒更悲江畔柳長是北
人攀

江行

唐馬戴

吳楚半秋色渡江逢葦花雲侵帆影落風逼鴈行
斜返照開嵐翠寒潮漾浦沙自將何所往海嶠欲

營家

曉發公安數月憩息此縣 唐杜甫

北城擊柝復欲罷東方明星亦不遲鄰雞野哭如
昨日物色生能幾時舟楫眇然自此去江湖遠
適無前期出門轉盼已陳跡藥餌扶吾隨所之

自鞏洛舟行入黃河卽事寄府縣僚友

唐韋應物

夾水蒼山路向東東南山豁大河通寒樹依微遠
天外夕陽明滅亂流中孤村幾歲臨伊岸一鴈初

晴下朔風為報洛橋遊宦侶扁舟不繫與心同

松滋渡望峽中

唐劉禹錫

渡頭輕雨灑寒梅雲際溶溶雪水來
夢渚草長迷楚望夷陵土黑有秦灰
巴人淚應猿聲落蜀客船從鳥道迴
十二碧峯何處所永安宮外是荒臺

發剡中

唐趙嘏

正懷何識俯長流更覽餘封謝
嵯州樹色老依官舍晚溪聲涼
傍客衣秋南巖氣爽橫郭郭天姥雲
晴拂寺樓日莫不堪還上馬
蓼花風起路悠悠

長安道中早行

唐張泌

客離孤館一燈殘半落星河欲曙天
雞唱未沉函谷月鴈聲新度灞陵煙
浮生已悟莊周夢壯志仍輸祖逖鞭
何事悠悠策羸馬此中辛苦過流年

早行

唐楊炯

敞朗東方徹闌干北斗斜地氣俄成霧
天雲漸作霞河流纔辨馬巖路不容車
阡陌經三歲閭閻對五家露文沾細草
風影轉高花日月從來惜關山猶自賒

言宿
卷之十五
三十五
夕次舊吳

唐駱賓王

維舟背楚服振策下吳畿
盛德弘三讓雄圖枕九圍
黃池通霸迹赤壁暢戎威
文物俄遷謝英靈有盛衰
行歎鴟夷沒遽惜湛盧飛
地古煙塵暗年深館宇稀
山川四望是人事一朝非
懸劍空留信亡珠尚識機
鄭風遙可託關月眇難依
西北雲逾滯東南氣轉微
徒懷伯通隱多謝買臣歸
唯有荒臺露薄暮濕征衣

早發諸暨

前人

征夫懷遠路夙駕上危巒
薄烟橫絕壑輕凍澀回湍
野霧連空暗山風入曙寒
帝城臨灞浹禹穴枕江干
橘性行應化蓬心去不安
獨掩窮途泣長歌行路難

早發淮口望盱眙

前人

養蒙分四瀆習坎奠三荆
徒帝留餘地封王表舊城
岸昏涵蜃氣潮滿應雞聲
洲迴連沙靜川虛積溜明
一朝從捧檄千里倦懸旌
背流桐栢遠逗浦木蘭輕
小山迷隱路大塊切勞生
唯有貞心在獨

映寒潭清

入東陽峽與李明府船前後不相及

唐陳子昂

東巖初解纜南浦遂離羣
出沒同洲島沿洄異渚
瀆風煙猶可望歌笑浩難聞
路轉青山合峯迴白日
曛奔濤上漫漫積浪下
沄沄倏忽猶疑及差池
復兩分離離間遠樹藹藹
沒遙氛地入巴陵道星
連牛斗文孤狃啼寒月
哀鴻叫斷雲仙舟不可見
搖思坐氛氲

早發始興江口至虛氏村作

唐宋之間

候曉踰閩嶂乘春望越臺
宿雲鵬際落殘月蚌中
開薜荔搖青氣枕椰翳
碧苔桂香多露裊石響細
泉回抱葉玄猿嘯銜花
翡翠來南中雖可悅北思
日憂哉鬢髮俄成素丹心
已作灰何當首歸路行
剪故園菜

早發韶州

前人

炎徼行應盡回瞻鄉路遙
珠崖天外郡銅柱海南

詩宿
標日夜晴明少冬春霧雨饒身經大火熱顏入瘴
江銷觸影含沙怒逢人女草搖露濃看茵濕風颯
覺船飄直禦魑將魅寧論鴛與鷓虞翻思報國許
靖願歸朝綠樹秦京道青雲洛水橋故園常在目
魂去不須招

發藤州

前人

朝夕苦逆征孤魂長自驚汎舟依鴈渚投轄聽猿
鳴石髮綠溪蔓林衣拂地輕雲峯刻不似苔壁畫
難成露衰千花氣泉和萬籟聲攀幽紅處歇躋險
綠中行戀切芝蘭砌悲纏松栢塋丹心江北死白
髮嶺南生魑魅天邊國窮愁海上城勞歌意無限
今日爲誰明

發端州初入西江

前人

問我將何去清晨泝越溪翠微懸宿雨丹壑飲晴
霓樹影稍雲密藤陰覆水低潮回出浦駛洲轉望
鄉迷人意長懷北江行日向西破顏看鵲喜拭淚
聽猿啼骨肉初分愛親朋忽解攜路遙魂欲斷身
辱理能齊疇日三山意于茲萬緒睽金陵有仙館

言宿
李集卷之十五
卽事尋丹梯

早入清遠峽

前人

傳聞峽山好旭日棹前沂
雨色搖丹嶂泉聲聒翠微
兩巖天作帶萬壑樹披衣
秋橘迎霜序春藤礙日輝
翳潭花似織緣嶺竹成圍
寂歷環沙浦蔥蘢轉石圻
露餘江未熱風落瘴初稀
猿飲排虛上禽驚掠水飛
榜童夷唱合樵女越吟歸
良候斯爲美邊愁自有違
誰言望鄉國流涕失芳菲

下桂江龍目灘

前人

停午出灘險輕舟容易前
峯攢入雲樹崖噴落江泉
巨石潛山恠深篁隱洞仙
鳥遊溪寂寂猿嘯嶺娟娟
揮袂日凡幾我行途已千
暝投倉梧郡愁枕白雲眠

秋晚度廢關

唐李行言

秦郊平舊險周德眷遺黎
始聞清夜柝俄見落封泥
物色來無限津途去不迷
空亭誰問馬閑戍但鳴雞
山月寒彌淨河風曉更淒
贈言揚伯起非復是關西

行至漢川作

唐孟浩然

異縣非吾土，連山盡綠篁。
平田出郭少，盤坂入雲長。
萬壑歸於漢，千峯劃彼蒼。
猿聲亂楚峽，人語帶巴鄉。
石上攢椒樹，藤間綴蜜房。
雪餘春未暖，嵐解晝初陽。
征馬疲登頓，歸帆愛渺茫。
坐欣沿溜下，信宿見維桑。

赴彭州山行之作

唐高適

峭壁連崆峒，攢峯疊翠微。
鳥聲堪駐馬，林色可忘機。
恠石時侵徑，輕蘿乍拂衣。
路長愁作客，年老更思歸。
且悅巖巒勝，寧嗟意緒違。
山行應未盡，誰與玩芳菲。

夜下征虜亭

唐李白

螢
船下廣陵去，月明征虜亭。
山花如繡纈，江火似流

經隴頭分水

唐岑參

腸
隴水何年有，潺潺逼路傍。
東西流不歇，曾斷幾人

江行無題六首

唐錢起

江曲全縈楚雲飛半自秦峴山回首望如別故鄉人

去指龍沙路徒懸象闕心夜涼無遠夢不爲偶聞砧

牽路緣江狹沙崩岸不平盡知行處險誰肯載時輕

月下江流靜村荒人語稀鷺鴛雖有伴仍共影雙飛

景夕殘霞落秋寒細雨晴短纓何用濯舟在月中

行

咫尺愁風雨匡廬不可登祇疑雲霧窟猶有六朝僧

江行

唐柳談

繁陰乍隱舟落葉初飛浦蕭蕭楚客帆日暮寒江雨

揚子途中

前人

楚塞望蒼然寒林古戍邊秋風人渡水落日鴈飛天

早發白帝城

唐李白

朝辭白帝彩雲間千里江陵一日還兩岸猿聲啼
不住輕舟已過萬重山

秋下荆門

前人

霜落荆門江樹空布帆無恙挂秋風此行不爲鱸
魚膾自愛名山入剡中

望天門山

前人

天門中斷楚江開碧水東流至北迴兩岸青山相
對出孤帆一片日邊來

過磧

唐岑參

黃沙磧裏客行迷四望雲天直下低爲言地盡天
還盡行到安西更向西

早度破訥沙

唐李益

破訥沙頭鴈正飛礪鶉泉上戰初歸平明日出東
南地滿磧寒光生鐵衣

從秦城回再題武關

唐李涉

遠別秦城萬里遊亂山高下入商州關門不鎖寒
溪水一夜潺湲送客愁

江南春

唐杜牧

千里鶯啼綠映紅
水村山郭酒旗風
南朝四百八十寺
多少樓臺煙雨中

初過漢江

唐盧中集

襄陽好向峴亭看
人物蕭條值歲闌
爲報習家多置酒
夜來風雪過江寒

雨後欲往天目山問元駱二公溪路

唐釋靈一

昨夜雲生天井東
春山一雨幾回風
林花併逐溪

流下欲上龍池通不通

江南三臺

唐王建

青草湖邊草色飛
後嶺上後聲萬里湘
江客到有風有雨人行

宿泊類

初發入南城

宋謝靈運

弄波不輟手
玩景豈停目
雖未登雲峯
且以歡水宿

赴荊州泊三江口

梁元帝

詩宿 全集卷之十五 四十三
涉江望行旅金鉦間綵旂水際含天色虹光入浪
浮柳條怕拂岸花氣盡薰舟叢林多故社單戍有
危樓疊鼓隨朱鷺長簫應紫駟蓮舟夾羽斃畫舸
覆緹油榜歌殊未息於茲泛安流

月半夜泊鵲尾

梁劉孝綽

客行三五夜息棹隱中洲月光隨浪動山影逐波
流

晚泊五洲

陳陰鏗

客行逢日暮結纜晚洲中戍樓因岷險村路入江

窮水隨雲度黑山帶日歸紅遙然一枝觀欲輕千
里風

宿青溪主人

唐李白

夜到青溪宿主人碧巖裏簷楹掛星斗枕席響風
水月落西山時啾啾夜猿起

宿鄭州

唐王維

朝與周人辭暮投鄭人宿他鄉絕儔侶孤客親僮
僕宛洛望不見秋霖晦平陸田父草際歸村童雨
中牧主人東臯上時稼繞茆屋蟲思機杼鳴雀喧

禾黍熟明當渡京水昨晚猶金谷此去欲何言窮
邊狗微祿

宿鑿石浦

唐杜甫

早宿賓從勞仲春江山麗飄風過無時舟楫不敢
繫回塘澹暮色日沒衆星噤缺月殊未生青燈死
分翳窮途多俊異亂世少恩惠鄙夫亦放蕩草草
頻卒歲斯文憂患餘聖哲垂象繫

夜宿浙江

唐孫逖

扁舟夜入江潭泊露白風秋氣蕭索富春渚上潮
未還天姥岑邊月初落煙水茫茫多苦辛更聞江
上越人吟洛陽城闕何時見西北浮雲朝暝深

深灣夜宿

唐王勃

津塗臨巨壑村宇架危岑堰絕灘聲隱峯交樹影
深江童暮理楫山女夜調砧此時故鄉遠寧知遊
子心

夜宿七盤嶺

唐沈佺期

獨遊千里外高臥七盤西山月臨窻近天河入戶
低芳春平仲綠清夜子規啼浮客空留聽衰城聞

曙雞

淮陰夜宿二首

唐孫逖

水國南無畔扁舟北未期鄉情淮上失歸夢郢中
疑木落知寒近山長見日遲客行心緒亂不及洛
陽時

永夕臥煙塘蕭條天一方秋風淮水落寒夜楚歌
長宿莽非中土鱸魚豈我鄉孤舟行已倦南越尚
茫茫

宿武陽川

唐孟浩然

川暗夕陽盡孤舟泊岸初嶺猿相叫嘯潭影似空
虛就枕滅明燭扣舷聞夜漁雞鳴問何處人物似
秦餘

夜泊牛渚趁薛八船不及 前人

星羅牛渚夕風送鷁舟遲浦澈常同宿煙波忽間
之榜歌空裏失船火望中疑明發泛湖海茫茫何
處期

宿陳留李少府宅

唐祖詠

相知有叔卿訟簡夜彌清旅泊倦愁臥空堂聞曙

更風簾搖燭影秋雨帶蟲聲歸思那堪說悠悠恨
洛城

泊揚子津

前人

纔入維揚郡鄉關此地遙林藏初霽雨風退欲歸
潮江火明沙岸雲帆礙浦橋客衣今正薄寒氣近
來饒

寒夜江口泊舟

唐儲光義

寒潮信未起出浦纜孤舟一夜苦風浪自然增旅
愁吳山遲海月楚火照江流欲有知音者異鄉難

可求

泊岳陽城下

唐杜甫

江國踰千里山城僅百層岸風翻夕浪舟雪灑寒
燈留滯才難盡艱危氣益增圖南未可料變化有
鯤鵬

宿江邊閣

前人

暝色延山徑高齋次水門薄雲巖際宿孤月浪中
翻鶴鶴追飛盡豺狼得食喧不眠憂戰伐無力正
乾坤

言宿
卷之十五
泊松滋江亭

前人

紗帽隨鷗鳥扁舟繫此亭江湖深更白松竹遠還青
一柱全應近高唐莫再經今宵南極外甘作老人星

舟月對驛近寺

前人

更深不假燭月朗自明船金刹青楓外朱樓白水邊
城烏啼眇眇野鷺宿娟娟皓首江湖客鉤簾獨未眠

泊舟盱眙

唐常建

泊舟淮水次霜降夕流清夜久潮侵岸天寒月近城
平沙依鴈宿候館聽雞鳴鄉國雲霄外誰堪羈旅情

秋夜宿淮口

唐景池

露白草猶青淮舟倚岸停風帆幾處客天地兩河星
樹靜禽眠草沙寒鹿過汀明朝誰結伴直去泛滄溟

泊楊子津

唐盧綸

山影南徐暮千帆入古津魚驚出浦火月照渡江

言宿
人青鏡悲雙鬢滄波寄一身空憐芳草色長接故園春

夜泊湘江

唐于武陵

北風吹楚樹此地獨先秋何事屈原恨不隨湘水流涼天生片月竟夕伴孤舟一作南行客無成空白頭

晚泊松江驛

唐李郢

片帆孤客晚夷猶紅蓼花前水驛秋歲月方驚離別盡煙波仍駐古今愁雲陰故國山川暮潮落空

江網罟收還有吳娃舊歌曲棹聲遙散采菱舟

宿驤河驛浦

唐陳子昂

沿流辭北渚結纜宿南洲合岸昏初夕迴塘暗不流行聞塞鴻斷坐聽峽猿愁沙浦明如月汀葭晦若秋未及能鳴鴈徒思海上鷗天河殊未曉滄海信悠悠

陪張丞相自松滋江東泊渚宮

唐孟浩然

放溜下松滋登舟命楫師詎忘經濟日不憚泛寒

時洗幘豈猶古濯纓良在茲政成人自理機息鳥
無疑雲物吟孤嶼江山辨四維晚來風稍緊冬至
日行遲獵響驚鳥雲夢漁歌激楚辭渚宮何處是川
暝欲安之

夜泊宣城界

前人

西塞沿江島南陵問驛樓潮平津濟闊風止客帆
收去去懷前浦茫茫泛夕流石逢羅刹礙山泊敬
亭幽火熾梅根冶煙迷楊葉洲離家復水宿相伴
賴沙鷗

宿建德江

前人

移舟泊煙渚日暮客愁新野曠天低樹江清月近
人

逢雪宿芙蓉山

唐劉長卿

日暮蒼山遠天寒白屋貧柴門聞犬吠風雪夜歸
人

夜泊九江

唐崔道融

夜泊江門外歡聲月下樓明朝歸去路猶隔洞庭
秋

夜泊湘江

唐郎士元

湘山木落洞庭波
湘水連雲秋鴈多
寂寞舟中人
借問月明只自聽漁歌

楓橋夜泊

唐張繼

月落烏啼霜滿天
江楓漁火對愁眠
姑蘇城外寒
山寺夜半鐘聲到客船

舟行夜泊

唐權德輿

蕭蕭落葉送殘秋
寂寞寒波急暝流
今夜不知何
處泊斷猿晴月引孤舟

晚泊潤州聞角

唐李涉

孤城吹角水茫茫
曲引邊聲怨思長
驚鳥起暮天沙
上鴈海門斜去兩三行

泊秦淮

唐杜牧

煙籠寒水月籠沙
夜泊秦淮近酒家
商女不知亡
國恨隔江猶唱後庭花

夜泊永樂有懷

唐許渾

蓮渚愁紅蕩碧波
吳娃齊唱採蓮歌
橫塘一別千
餘里蘆葦蕭蕭風雨多

旅懷類

隴頭歌二首

漢無名氏

隴頭流水流離四下念我行役飄然曠野節文

隴頭流水鳴聲幽咽遙望秦川肝腸斷絕

古歌

同前

高田種小麥終久不成穗男兒在他鄉焉得不憔悴

悴

悲歌

漢樂府

悲歌可以當泣遠望可以當歸思念故鄉鬱鬱鬱鬱

累欲歸家無人欲渡河無船心思不能言腸中車

輪轉

古歌

同前

秋風蕭蕭愁殺人出亦愁入亦愁座中何人誰不

懷憂令我白頭故地多飈風樹木何脩脩離家日

趨遠衣帶日趨緩心思不能言腸中車輪轉

古八變歌

同前

北風初秋至吹我章華臺浮雲多暮色似從崦嵫

來枯桑鳴中林緯絡響空堦翩翩飛蓬征愴愴游

詩宿 卷之十五 五十二
子懷故鄉不可見長望始此回

巫山高

同前

巫山高高以大淮水深難以逝我欲東歸害梁不
爲我集無高曳水何梁湯湯回回臨水遠望泣下
沾衣遠道之人心思歸謂之何

雜詩二首

魏文帝

漫漫秋夜長烈烈北風涼展轉不能寐披衣起彷徨
徨徨忽已久白露露我裳俯視清水波仰看明月
月光天漢回西流三五正從橫草蟲鳴何悲孤鴈

獨南翔鬱鬱多悲思綿綿思故鄉願飛安得翼欲
濟河無梁向風長嘆息斷絕我中腸

西北有浮雲亭亭如車蓋惜哉時不遇適與飄風
會吹我東南行行至吳會吳會非我鄉安得久
留滯弃置勿復陳客子常畏人

又

魏曹植

轉蓬離本根飄飄隨長風何意迴飈舉吹我入雲
中高高上無極天路安可窮類此游客子捐軀遠
從戎毛褐不掩形薇藿常不充去去莫復道沉憂

令人老

盤石篇

前人

盤盤山巔石飄颻澗底蓬我本太山人何爲客淮
東蒹葭彌斥土林木無分重坼巖若崩缺湖水何
洶洶蚌蛤被濱涯光彩如錦虹高彼凌雲霄浮氣
象螭龍鯨脊若丘陵鬚若山上松呼吸吞船櫂澎
淖戲中鴻方舟尋高價珍寶麗以通一舉必千里
乘颶舉帆幢經危履險阻未知命所鍾常恐沈黃
壚下與龜鼈同南極蒼梧野游盼窮九江中夜指
參辰欲師當定從仰天長太息思想懷故邦乘桴
何所志吁嗟我孔公

情詩

前人

微陰翳陽景清風飄我衣遊魚潛綠水翔鳥薄天
飛眇眇客行士遙役不得歸始出嚴霜結今來白
露晞遊子歎黍離處者歌式微慷慨對嘉賓悽愴
內傷悲

遊覽

魏陳琳

高會時不娛羈客難爲心殷懷從中發悲感激清

音投觴罷歡坐逍遙步長林肅肅山谷風默默天
路陰惆悵忘旋反歔歔涕霑襟

吳王郎中時從梁陳作

晉陸機

在昔蒙嘉運矯迹入崇賢假翼鳴鳳條濯足升龍
淵玄冕無醜士冶服使我妍輕劔撫鞞礪長纓麗
且鮮誰謂伏事淺契闊踰三年薄言肅後命改服
就藩臣夙駕尋清軌遠遊越梁陳感物多遠念慷
慨懷古人

悲哉行

前人

游客芳春林春芳傷客心和風飛清響鮮雲垂薄
陰蕙草饒淑氣時鳥多好音翩翩鳴鳩羽啾啾倉
庚吟幽蘭盈通谷長秀被高岑今女蘿亦有託蔓葛
亦有尋傷哉客游士憂思一何深日感隨氣草耳
悲詠時禽寤寐多遠念緬然若飛沈願託歸風響
寄言遺所欽

雜詩

晉王讚

朔風動秋草邊馬有歸心胡寧久分析靡靡忽心至
今王事離我志殊隔過商參昔往鶴鷓鳴今來蟋

言宿 奎集卷之十五 五十五
蟀吟人情懷舊鄉客鳥思故林師涓久不奏誰能
宣我心

道路憶山中

宋謝靈運

采菱調易急江南歌不緩楚人心昔絕越客腸今
斷斷絕雖殊念俱爲歸慮歎存鄉爾思積憶山我
憤滿追尋棲息時偃臥任縱誕得性非外求自己
爲誰纂不怨秋夕長常苦夏日短濯流激浮湍息
陰倚密竿懷故叵新歡含悲忘春暖悽悽明月吹
惻惻廣陵散殷勤訴危柱慷慨命促管

西陵遇風獻康樂二首

宋謝惠連

靡靡卽長路戚戚抱遙悲遙但自彌路長當語
誰行行道轉遠去去情彌遲昨發浦陽汭今宿浙
江湄

臨津不得濟佇楫阻風波蕭條洲渚際氣色少諧
和西瞻興遊歎東睇起悽歌積憤成疢毒無慮將
如何

夢還詩

宋鮑照

銜淚出郭門撫劔無人達沙風閭塞起離心眷鄉

幾夜分就孤枕夢想暫言歸孀婦當戶歎縑絲復
鳴機慊歎論久別相將還綺幃歷歷簷下涼朧朧
窻裏暉刈蘭爭芬芳採菊競歲莖開奩集香蘇探
袖解纓微寐中長路近覺後大江違驚鳥起空歎息
恍惚神魂飛白水漫浩浩高山壯魏魏波瀾異往
復風雲改榮衰此土非吾土慷慨當訴誰

胡笳曲

宋吳邁遠

輕命重意氣古來豈但今緩頰獻一說楊眉受千
金邊風落寒草鳴笳墜飛禽越情結楚思漢耳聽
胡音既懷離俗傷復悲朝光侵日當故鄉沒遙見
浮雲陰

江南思

宋湯惠休

幽客海陰路留戍淮陽津垂情向春草知是故鄉
人

京路夜發

齊謝朓

擾擾整夜裝肅肅戒徂兩曉星正寥落晨光復潒
潒猶霑餘露團稍見朝霞上故鄉邈已夏山川脩
且廣文奏方盈前懷人去心賞勅躬每跼踖瞻恩

惟震蕩行矣倦路長無由稅歸鞅

折楊柳

梁元帝

巫山巫峽長垂柳復垂楊同心不同折故人懷故鄉
山似蓮花艷流如明月光寒夜猿聲徹遊子淚
霑裳

夜宿柏齋

前人

燭暗行人靜簾開雲影入風細雨聲遲夜短更籌
急能下班姬淚復使倡樓泣况此客游人中宵空
佇立

中川長望

梁王僧孺

長川杳難卽四望四無極安流寧可值憤風方未
息危帆渡中懸孤光巖下晃岸際樹難辨雲中鳥
易識莫恨東復西誰知迂且直故鄉相思者當春
愛顏色獨寫千行淚誰同萬里憶

邊城思

梁何遜

柳黃未吐葉水綠半含苔春色邊城動客思故鄉
來

慈姥磯

前人

暮煙起遙岸斜日照安流一同心賞夕斲解去鄉
憂野岸平沙合連山遠霧浮客悲不自己江上望
歸舟

日夕望江山贈魚司馬

前人

湓城帶湓水湓水縈如帶日夕望高城耿耿青雲
外城中多宴賞絲竹常繁會管聲已流悅弦聲復
悽切歌黛慘如愁舞腰凝欲絕仲秋黃葉下長風
正騷屑早鴈出雲歸故燕辭簷別晝悲在異縣夜
夢還洛汭洛汭何悠悠起望登西樓的的帆向浦
團團日隱洲誰能一羽化輕舉逐飛浮

還渡浙江

梁劉孝綽

季秋弦望後輕寒朝夕殊商人泣紈扇客子夢羅
襦憂來自難遣况復阻川隅日暮愁陰合繞樹噪
寒烏濛漠江煙上蒼茫沙嶼蕪解纜辭東越接舫
驚西徂懸帆似馳驥飛權若驚鳧言歸遊俠窟方
從冠蓋衢

夜夢還家

梁庾丹

歸飛夢所憶共子汲寒漿銅瓶素絲綆綺井白銀

言宿
卷之十五
五十九
牀雀出羊茸樹蟲飛玳瑁梁離人不相見爭忍對
春光

入彭城館

北周庾信

襄君前建國項氏昔稜威鴟飛傷楚戰雞鳴悲漢
圍羊代殊氓俗風雲更盛衰水流浮磬動山喧雙
翟飛夏餘花欲盡秋近鷺將稀槐庭垂綠穗蓮浦
落紅衣徒知日云暮不見舞雲歸

入蜀秋夜宿江渚

隋陳子良

我行逢日暮彌懼獨維舟水霧一邊起風林兩岸

秋山陰黑斷磧月影素寒流故鄉萬里外何以慰
羈愁

臨高臺

唐沈佺期

高臺臨廣陌車馬紛相續回首思舊鄉雲山亂心
曲遠望河流緩周看原野綠向夕林鳥還憂來飛
景促

秋浦歌

唐李白

秋浦長似秋蕭條使人愁客愁不可度行上東大
樓正西望長安下見江水流寄言向江水汝意憶

儂不遙傳一掬淚爲我達揚州

白田馬上聞鶯

前人

黃鸝啄紫椹五月鳴桑枝我行不記日誤作陽春
時蠶老客未歸白田已繅絲驅馬又前去捫心空
自悲

春滯沅湘有懷山中

前人

沅湘春色還風暖煙草綠古之傷心人於此腸斷
續予非懷沙客但美採菱曲所願歸東山寸心於
此足

秋夕旅懷

前人

涼風度秋海吹我鄉思飛連山去無際流水何時
歸目極浮雲色心斷明月暉芳草歇柔艷白露催
寒衣夢長銀漢落覺罷天星稀含悲想舊國泣下
誰能揮

江南春懷

前人

青春幾何時黃鳥鳴不歇天涯失鄉路江外老華
髮心飛秦塞雲影滯楚關月身世殊瀾漫田園久
蕪沒歲晏何所從長歌謝金闕

古風

前人

秦水別隴首幽咽多悲聲胡馬顧朔雪躑躅長嘶
鳴感物動我心緬然含歸情昔視秋蛾飛今見春
蠶生嫋嫋桑結葉萋萋柳垂榮急節謝流水羈心
搖懸旌揮涕且復去惻愴何時平

東平路作

唐高適

清曠涼夜月徘徊孤客舟眇然風波上獨夢前山
秋秋至復搖落空令行者愁

遣興

唐杜甫

蓬生非無根漂蕩隨高風天寒落萬里不復歸本
叢客子念故宅三年門巷空悵望但烽火戎車滿
關東生涯能幾何常在羈旅中

石櫃閣

前人

季冬白日已長山晚半天赤蜀道多草花江間饒奇
石石櫃層波上臨虛蕩高壁清暉迴羣鷗暝色帶
遠客羈栖負幽意感歎向絕跡信甘孱懦嬰不獨
凍餒迫優游謝康樂放浪陶彭澤吾衰未自由謝
爾性有適

成都府

前人

翳翳桑榆日照我征衣裳我行山川異忽在天一方
但逢新人民未卜見故鄉大江東流去遊子去
日長層城填華屋季冬樹木蒼喧然名都會吹簫
間笙簧信美無與適側身望川梁烏雀夜各歸中
原杳茫茫初月出不高衆星尚爭光自古有羈旅
我何苦哀傷

擬古

唐韋應物

辭君遠行邁飲此長恨端已謂道里遠如何中嶮
艱流水赴大壑孤雲還暮山無情尚有歸行子何
獨難驅車背鄉國朔風卷行跡嚴冬霜斷肌日入
不遑息憂歡容鬢改寒暑人事易中心君詎知冰
玉徒貞白

長安秋夜

唐戎昱

八月更漏長愁人起常早閉門寂無事滿院生秋
草昨宵西窗夢夢入荆南道遠客歸去來在家貧
亦好

秋風

唐杜甫

言宿
秋風淅淅吹我衣東流之外西日微天晴小城擣
練急石古細路行人稀不知明月為誰好早晚孤
帆他夜歸會將白髮倚庭樹故園池臺今是非

羈旅行

唐張籍

遠客出門行路難停車斂策在門端荒城無人雪
滿路野火燒橋不得度寒蟲入窠鳥歸窠僮僕問
我誰家去行尋田頭暗未息雙轂長轆礙荆棘緣
岡入澗投田家主人舂米為夜食晨雞喔喔茅屋
傍行人起掃車上霜雀白山已別行已遠身計未成

難復返長安陌上相識稀遙望天門白日晚誰能
聽我辛苦行為向君前歌一聲

入桂渚次砂牛石穴

唐劉長卿

扁舟傍歸路日暮瀟湘深湘水清見底楚雲淡無
心片帆落桂渚獨夜依楓林楓林月出猿聲苦桂
渚天寒桂花吐此中無處不堪愁江客相看淚如
雨

凌朝浮江旅思

唐韋承慶

天晴上初日春水送孤舟山遠疑無樹潮平似不

言宿
卷之十五
四
流岸花開且落江鳥沒還浮羈望傷千里長歌遣
四愁

晚次樂鄉縣

唐陳子昂

故鄉杳無際日暮且孤征川原迷舊國道路入邊
城野戍荒煙斷深山古木平如何此時恨噉噉夜
猿鳴

旅寓安南

唐杜審言

交趾殊風候寒遲暖復催仲冬山果熟正月野花
開積雨生昏霧輕霜下震雷故鄉踰萬里客思倍

從來

襄城卽事

唐崔湜

子牟懷魏闕元凱滯襄城冠蓋仍爲客池臺尚識
名山光晴後綠江色晚來清借問東流水何時到
玉京

旅宿淮陽亭口號

唐張九齡

日暮荒亭望悠悠旅思多故鄉臨桂水今夜眇星
河暗草霜華發空亭鴈影過興來誰與晤勞者自
爲歌

次北固山下

唐王灣

客路青山外行舟綠水前
潮平兩岸闊風正一帆
懸海日生殘夜江春入舊年
鄉書何處達歸鴈洛陽邊

早寒有懷

唐孟浩然

木落鴈南渡北風江上寒
我家襄水曲遙隔楚雲
端鄉淚客中盡孤帆天際看
迷津欲有問平海夕漫漫

登新平樓

唐李白

去國登茲樓懷歸傷暮秋
天長落日遠水淨寒波
流秦雲起嶺樹胡鴈飛
沙洲蒼蒼幾萬里目極令人愁

太原早秋

前人

歲落衆芳歇時當大火流
霜威出塞早雲色渡河
秋夢繞邊城月心飛故國樓
思歸若汾水無日不悠悠

秋浦歌

前人

秋浦猿愁夜黃山堪白頭
清溪非隴水翻作斷腸

詩宿
李集卷之十五
六十六
流欲去不得去薄遊成久遊何年是歸日雨淚下
孤舟

望秦川

唐李頎

秦川朝望迴日出正東峯遠近山河淨逶迤城闕
重秋聲萬戶竹寒色五陵松客有歸歟嘆淒其霜
露濃

江南旅情

唐祖詠

楚山不可極歸路但蕭條海色晴看雨江聲夜聽
潮劒留南斗近書寄北風遙爲報空潭橘無媒寄

洛橋

途中曉發

唐崔曙

曉霽長風裏勞歌赴遠期雲輕歸海疾月滿下山
遲旅望因高盡鄉心遇物悲故林遙不見况在洛
花時

漢陽卽事

唐儲光義

楚國千里遠孰知方寸違春遊歡有客夕寢賦無
衣江水帶冰綠桃花隨雨飛九歌有深意捐珮乃
言歸

言宿
卷之十五
巴南舟中夜書事

唐岑參

渡口欲黃昏歸人爭渡喧近鐘清野寺遠火點江
村見鴈思鄉信聞猿積淚痕孤舟萬里夜秋月不
堪論

巴南舟中思陸渾別業

前人

瀘水南州遠巴山北客稀嶺雲撩亂起溪鷺等閒
飛鏡裏愁衰鬢舟中換旅衣夢魂知憶處無夜不
先歸

還東山洛上作

前人

春流急不淺歸棹去何遲愁客葉舟裏夕陽花水
時雲晴開蝶竦權發如心鷓鴣莫道東山遠衡門在
夢思

過酒泉憶杜陵別業

前人

昨夜宿祁連今朝過酒泉黃沙西際海白草北連
天愁裏難消日歸期尚隔年陽關萬里夢知處杜
陵田

客舊館

唐杜甫

陳迹隨人事初秋別此亭重來梨葉赤依舊竹林

言宿
青風慢何時卷寒砧昨夜聽無由出江漢愁緒日
冥冥

更題

前人

只因踏初雪騎馬發荊州直怕巫山雨真傷白帝
秋羣公蒼玉珮天子翠雲裘同舍晨趨侍胡為淹
此留

薄遊

前人

浙浙風生砌團團月隱牆遙空秋鴈滅半嶺暮雲
長病葉多先墜寒花只暫香巴城添淚眼今夕復

清光

旅夜書懷

前人

細草微風岸危檣獨夜舟星隨平野闊月湧大江
流名豈文章著官因老病休飄飄何所似天地一
沙鷗

雲山

前人

京洛雲山外音書靜不來神交作賦客力盡望鄉
臺衰疾江邊臥親朋日暮迴白鷗元水宿何事有
餘哀

客夜

前人

客睡何曾著秋天不肯明入簾殘月影高枕遠江
聲計拙無衣食途窮仗友生老妻書數紙應悉未
歸情

渝州候嚴六侍御不到先下峽

前人

聞道乘驄發沙邊待至今不知雲雨散虛費短長
吟山帶烏蠻闊江連白帝深船經一柱觀留眼共
登臨

岳陽晚景

唐張均

晚景寒鷗集秋風旅鴈歸水光浮日出霞彩映江
飛洲白蘆花吐園红柿葉稀長沙卑濕地九月未
成衣

郡中客舍

唐黃麟

蟲響亂啾啾更人正數籌魂歸洞庭夜霜臥洛陽
秋微月有時隱長河到曉流起來還屬鴈鄉信在
吳洲

途次維揚望京口寄白下諸公

唐蔣渙

北望情可限南行路轉深
晚帆低菼葉寒日下楓
林雲白蘭陵渚煙青
建業岑江天秋向盡
無處不傷心

餘于旅舍

唐劉長卿

搖落暮天迴青楓霜葉稀
孤城向水閉獨鳥背人
飛渡口月初上鄰家漁
未歸鄉心正欲絕何處
搗寒衣

新年作

前人

鄉心新歲切天畔獨潸然
老至居人下春歸在客
先嶺猿同旦暮江柳共
風煙已似長沙傳從今
又幾年

歸渡洛水

唐皇甫冉

暝色赴春愁歸人南渡頭
渚煙空翠合灘月碎光
流澧浦饒芳草滄浪有
釣舟誰知放歌客此意
正悠悠

洛陽早春

唐顧況

何地避春秋終年憶舊遊
一家千里外百舌五更

言宿
東流
頭客路偏逢雨鄉山不入樓故園桃李月伊水向

薊北旅思

唐張籍

日日望鄉國空歌白紵詞長因送人處憶得別家
時失意還獨語多愁祇自知客亭門外柳折盡向
南枝

夕次襄邑

唐釋清江

何處成吾道經年遠路中客心猶向北河水自歸
東古戍鳴寒角疎林振夕風輕舟唯載月那與故

人同

望樊川

唐釋澹交

萬樹葉初紅人家樹色中疎鐘搖雨氣積水浸雲
容雪磧迴寒鴈村燈促夜春舊山歸未得生計欲
何從

宿府

唐杜甫

清秋幕府井梧寒獨宿江城蠟炬殘永夜角聲悲
自語中天月色好誰看風塵荏苒音書絕關塞蕭
條行路難已忍伶俜十年事強移棲息一枝安

感懷

唐劉長卿

清楓落葉正堪悲，黃菊殘花欲待誰。
水近偏逢寒氣早，山深常見日光遲。
愁中卜命看周易，病裏招魂讀楚詞。
自恨不如湘浦鴈，春來卽是北歸時。

晚次鄂州

唐盧綸

雲開遠見漢陽城，猶是孤帆一日程。
估客畫眠知浪靜，舟人夜語覺潮生。
三湘愁鬢逢秋色，萬里歸心對月明。
舊業已隨征戰盡，更堪江上鼓鼙聲。

長安春望

前人

東風吹雨過青山，却望千門草色閒。
家在夢中何日到，春來江上幾人還。
川原繚繞浮雲外，宮闕參差落照間。
誰念爲儒逢世難，獨將衰鬢客秦關。

陸勝宅秋雨中探韻同作

唐張南史

同人未日自相將，深竹閒園偶辟疆。
已被秋風教憶鱸，更聞寒雨動飛觴。
歸心莫問三江水，旅服從霜九日霜。
醉裏欲尋騎馬路，蕭條是處有垂楊。

臥疾

唐許渾

寒窻燈盡月斜輝，珮馬朝天獨掩扉。
清露已凋秦

塞柳白雲空長越山薇病中送客難爲別夢裏還
家不當歸唯有寄書書未得臥聞燕鴈向南飛

江行書事

唐劉滄

遠渚蒹葭覆綠苔姑蘇南望思徘徊空江獨樹楚
山背暮雨孤舟吳苑來人度深秋風葉落鳥飛殘
照水煙開寒潮欲上泛蘋藻寄薦三閭情自哀

晚度天山有懷京邑

唐駱賓王

忽上天山路依然想物華雲疑上苑葉雪似御溝
花行嘆戎麾遠坐憐衣帶賒交河浮絕塞弱水沒

流沙旅思徒漂梗歸期未及瓜寧知心斷絕夜夜
泣胡笳

晚憩田家

前人

轉蓬勞遠役披薜下田家山形類九折江勢急三
巴懸梁接斷岸澀路擁崩查霧巖淪曉魄風激漲
寒沙心迹一朝舛關山萬里賒龍章徒表越閩俗
本非華旅行悲泛梗離贈竹疎麻唯有寒潭菊獨
似故園花

寒夜獨坐遊子多懷簡知己

前人

故鄉眇千里離憂積萬端
鶉服常悲碎蝸廬未卜
安富鉤徒有想貧缺爲誰彈
柳秋風葉脆荷曉露
文團晚金叢岸菊餘佩下幽蘭
伐木傷心易維桑
歸去難獨有孤明月時照客庭寒

江行有懷

唐孫逖

秋水明川路輕舟轉石圻
霜多山橘熟寒至浦禽
稀飛席乘風勢迴流蕩日暉
晝行疑海若夕夢識
江妃野霽看吳盡天長望洛非
不知何歲月一似

暮潮歸

東屯月夜

唐杜甫

抱疾漂萍老防邊舊穀屯
春農親異俗歲月在衡
門青女霜楓重黃牛峽水喧
泥留虎鬪跡月挂客
愁村喬木澄稀影輕雲倚細根
數驚聞雀噪暫睡
想猿蹲日轉東方白風來北斗昏
天寒不成寐無
夢寄歸魂

山中

唐王勃

長江悲已滯萬里念將歸
况屬高風晚山山黃葉

言
飛

始平晚息

前人

觀闕長安近江山蜀道賒客行朝復夕無處是鄉家

他鄉敘興

前人

綴葉歸煙晚乘花落照春邊城琴酒處俱是越鄉人

臨江二首

前人

泛泛東流水飛飛北上塵歸驂將別權俱是倦遊

人

去驂嘶別路歸權隱寒洲江臯木葉下應想故城

秋

晉安建陰題壁

前人

江漢深無極梁岷不可攀山川雲霧裏遊子幾時還

羈春

前人

客心千里倦春事一朝歸還傷北園裏重見落花飛

詩

卷之十五

七十五

冬郊行望

前人

桂密巖花白梨疎林葉紅江臯寒望盡歸念斷征蓬

渡漢江

唐宋之間

嶺外音書斷經冬復歷春還鄉情更怯不敢問來人

汾上驚秋

唐蘇頌

北風吹白雲萬里渡河汾心緒逢搖落秋聲不可聞

蜀道後期

唐張說

客心爭日月來往預期程秋風不相待先至洛陽城

靜夜思

唐李白

牀前看月光疑是地上霜舉頭望山月低頭思故鄉

奔亡道中作

前人

蘇武天上田橫海島邊萬重關塞斷何日是歸年

望木瓜山

前人

早起見日出暮見棲鳥還
客心自酸楚况對木瓜山

雜詩三首

唐王維

家住孟津河門對孟津口
常有江南船寄書家中否

君自故鄉來應知故鄉事
來日綺窻前寒梅著花未

已見寒梅發復聞啼鳥聲
心心視春草畏向玉階

生

見渭水思秦川

唐岑參

渭水東流去何時到雍州
憑添兩行淚寄向故園流

途中口號

唐郭向

抱玉三朝楚懷書十上秦
年年洛陽陌花鳥弄歸人

聞鴈

唐韋應物

故園眇何處歸思方悠哉
淮南秋雨夜高齋聞鴈

言宿
來

西樓

前人

高閣一長望故園何日歸
煙塵擁函谷秋鴈過來
稀

春日歸家

唐李嘉祐

自覺勞鄉夢無人見
客心空餘庭草色日日伴愁
襟

寒塘

唐司空曙

曉髮梳臨水寒塘坐見秋鄉心
正無限一鴈度南

樓

登相國寺閣

唐劉商

晴日登臨好春風各望家
垂楊夾城路客思逐楊
花

零陵早春

唐柳宗元

問春從此去幾日到秦原
憑寄還鄉夢殷勤入故
園

夏陽亭臨望

唐元稹

望遠音書絕臨川意緒長
殷勤眼前水千里到河

陽

思歸樂

唐張祐

萬里春歸盡
三江鴈亦稀
連天漢水廣
孤客未言歸

滯雨

唐李商隱

滯雨長安夜
殘燈獨客愁
故鄉雲水地
歸夢不宜秋

客愁

唐溫庭筠

客愁看柳色
日日逐春深
蕩漾春風裏
誰知歷亂心

心

歸燕

唐崔道融

海燕頻來去
西人獨滯留
天邊又相送
腸斷故園秋

寒食汜上作

唐王維

廣武城邊逢暮春
汶陽歸客淚霑巾
落花寂寂啼山鳥
楊柳青青渡水人

渡浙江問舟中人

唐孟浩然

潮落江平未有風
扁舟共濟與君同
時時引領望

天末何處青山是越中

聽流人水調子

唐王昌齡

孤舟微月對楓林分付鳴箏與客心
嶺色千重萬重雨斷絃收與淚痕深

赴北庭度隴思家

唐岑參

西向輪臺萬里餘也知鄉信日應疎
隴山鸚鵡能言語爲報家人數寄書

磧中作

前人

走馬西來欲到天辭家見月兩回圓
今夜不知何處宿平沙萬里絕人煙

逢入京使

前人

前人

故園東望路漫漫雙袖龍鐘淚不乾
馬上相逢無紙筆憑君傳語報平安

首蓓峯寄家人

前人

首蓓峯邊逢立春胡蘆河上淚霑巾
閨中只是空相憶不見沙場愁殺人

解悶

唐杜甫

一辭故國十經秋每見秋瓜憶故丘
今日南湖采

言宿
全集卷之十五
八十一
微蕨何人爲覓鄭瓜州

客中作

唐杜儼

書劔催人
不暫閒
洛陽羈旅復秦關
容顏歲歲愁
邊改鄉國時時夢
裏還

聽角思歸

唐顧況

故園黃葉滿青苔
夢後城頭曉角哀
此夜斷腸人不見
起行殘月影徘徊

憶故園

前人

惆悵多山人
復稀杜鵑啼
處淚霑衣
故園此去千

餘里春夢猶能夜夜歸

夜發烏江作

唐戴叔倫

半夜迴舟入楚鄉
月明山色共蒼蒼
猿猴更叫秋風裏
不是愁人也斷腸

秋草

唐張籍

洛陽城裏見秋風
欲作家書意萬重
復恐匆匆說不盡
行人臨發又開封

旅次寄湘南張郎中

唐戎昱

寒江近戶慢流聲
竹影當窻亂月明
歸夢不知湘

水閣夜來還到洛陽城

渡桑乾

唐賈島

客舍并州已十霜歸心日夜憶咸陽無端更渡桑乾水却望并州是故鄉

端居

唐李商隱

遠書歸夢兩悠悠只有空牀敵素秋階下青苔與紅葉雨中寥落月中愁

宿嘉陵館樓

唐雍陶

離思茫茫正值秋每因風景却生愁今宵難作刀

州夢月色江聲共一樓

寄遠

唐趙嘏

禁鐘聲盡見栖禽關塞迢迢故國心無限春秋莫相問落花流水洞房深

旅懷

唐杜荀鶴

月華星彩坐來收嶽色江聲暗結愁半夜燈前十年事一時和雨到心頭

武昌阻風

唐方澤

江上春風阻客舟無窮歸思滿東流與君盡日間

臨水貪看飛花忘却愁

雜詩

唐才調詩

無定河邊暮笛聲
赫連臺畔旅人情
函關歸路千餘里
一夕秋風白髮生

去國類

孔子去魯歌

彼婦之口可以出走
彼婦之謁可以死敗
優哉游哉聊以卒歲

孔子龜山操

予欲望魯兮龜山蔽之手無斧柯奈龜山何

至端州驛見杜五審言沈三佺期間五朝隱

王二無競題壁慨然成咏 唐宋之問

逐臣北地承嚴譴
調到南中每相見
豈意南中岐路多
千山萬水分鄉縣
雲搖雨散各翻飛
海闊天長音信稀
處處山川同瘴癘
自憐能得幾人歸

度大庾嶺

前人

度嶺方辭國
停輶一望家
魂隨南翥鳥
淚盡北枝花
山雨初含霽
江雲欲變霞
但令歸有日
不敢恨

長沙

却歸睦州至七里灘下作 唐劉長卿

南歸猶謫宦獨上子陵灘江樹臨洲晚沙禽對水
寒山開斜照在石淺亂流難惆悵梅花發年年此
地看

至七里灘作 唐李嘉祐

遷客投于越臨江淚滿衣獨隨流水去轉覺故人
稀萬木迎秋序千峯駐晚暉行舟猶未已惆悵暮
潮歸

遙同杜員外審言過嶺 唐沈佺期

天長地闊嶺頭分去國離家見白雲洛浦風光何
所似崇山瘴癘不堪聞南浮漲海人何處北望衡
陽鴈幾羣兩地江山萬餘里何時重謁聖明君

自夏口至鸚鵡洲夕望岳陽寄阮中丞

唐劉長卿

汀洲無浪復無煙楚客相思益渺然漢口夕陽斜
度鳥洞庭秋水遠連天孤城背嶺寒吹角獨戍臨
江夜泊船賈誼上書憂漢室長沙謫去古今憐

言箱 卷之十五 八十五
貶降至汝州廣城驛

唐鄭愔

近郊憑汝海遐服指江干尚憶趨朝貴方知失路
難曙宮平樂遠秋澤廣城寒岸葦新花白山梨晚
葉丹鄉關千里暮歲序四時闌函塞雲間別旋門
霧裏看夙年追駮驥暮節仰鵷鸞疲駕勞垂耳騫
騰詎矯翰將調梅鉉實不正李園冠荆玉終無玷
隋珠忽已彈曉裝違輦洛夕夢在長安北上頻傷
阮西征未學潘傾車無共轍同派有殊瀾去去懷
知己何由報一餐

巴丘春日作

唐張均

日出洞庭水春山挂斷霞江泝相映發卉木共紛
華湘戍南浮闊荆關北望賒湖陰窺魍魎丘勢辨
巴蛇島戶巢爲館漁人艇作家自憐心問影三歲
客長沙

謫居干越亭作

唐劉長卿

天南愁望絕亭上柳條新落日獨歸鳥孤舟何處
人生涯投越徼世業陷胡塵杳杳鍾陵莫悠悠鄙
水春秦臺悲白首楚澤怨青蘋草色迷征路鶯聲

言宿
李集卷之十五
六十六
傍逐臣獨醒翻引笑直道不容身得罪風霜苦全
生天地仁青山數行淚滄海一窮鱗牢落機心盡
唯憐鷗鳥親

廣州江中作

唐張說

去國年方晏愁心獨不堪離人共江水終日向西
南

南樓望

唐盧僎

去國三巴遠登樓萬里春傷心江上客不是故鄉
人

流夜郎題葵葉

唐李白

慙君能衛足歎我遠移根白日如分照還歸守故
園

渡湘江

唐杜審言

遲日園林悲昔遊今春花鳥作邊愁獨憐京國人
南竄不似湘江水北流

流夜郎聞酺不預

唐李白

北闕聖人歌太康南冠君子竄遐荒漢酺聞奏鈞
天樂願得風吹到夜郎

聞白樂天左降江州司馬 唐元稹

殘燈無焰影幢幢此夕聞君謫九江垂死病中驚
坐起暗風吹雨入寒窗

袁 擢楷書

古自寵校刊

張 贇督刊

詩宿卷之十五終

國家圖書館, NATIONAL CENTRAL LIBRARY, TAIWAN, R.O.C.

詩
宿

卷之十六

餞送部

婁集

國家圖書館, NATIONAL CENTRAL LIBRARY, TAIWAN, R.O.C.

詩宿卷之十六

婁集

長山劉一相彙輯 男鴻訓鴻範鴻采叅閱

章丘木良知

稷山梁蕙 鄭寅校次

關中何補之 來臨訂正

餞送部

驪駒

古逸

驪駒在門僕夫具存驪駒在路僕夫整駕

與蘇武詩三首

漢李陵



言宿
良時不再至離別在須臾屏營衢路側執手野踟
躑仰視浮雲馳奮忽互相踰風波一失所各在天
一隅長當從此別且復立斯須欲因晨風發送子
以殘軀

攜手上河梁游子暮何之徘徊蹊路側恨恨不能
辭行人難久留各言長相思安知非日月弦望自
有時努力崇明德皓首以爲期

嘉會難再遇三載爲千秋臨河濯長纓念子悵悠
悠遠望悲風至對酒不能酬行人懷往路何以慰

我愁獨有盈觴酒與子結綢繆

擬李陵錄別四首

漢無名氏

晨風鳴北林熠燿東南飛願言所相思日暮不垂
帷明月照高樓想見餘光輝玄鳥夜過庭鬢髮能
復飛寒裳路踟躑彷徨不能歸浮雲日千里安知
我心悲思得瓊樹枝以解長渴饑

紅塵蔽天地白日何冥冥微陰盛殺氣淒風從此
興招搖西北指天漢東南傾嗟爾窮廬子獸行如
履冰短褐中無緒帶斷續以繩瀉水置瓶中焉辨

言
集卷之十六
三
淄與澠巢父不洗耳後世有何稱

爍爍三星列拳拳月初生寒涼應節至蟋蟀夜悲
鳴晨風動喬木枝葉日夜零遊子暮思歸塞耳不
能聽遠望正蕭條百里無人聲豺狼鳴後園虎豹
步前庭遠處天一隅苦困獨零丁親人隨風散歷
歷如流星三泮離不結思心獨屏營願得萱草枝
以解饑渴情

寂寂君子坐奕奕合衆芳溫聲何穆穆因風動馨
香清言振東序良時著西庠乃命絲竹音列席無
莫不傷
高唱悲意何慷慨清歌正激揚長哀發華屋四坐

古詩

同前

四坐且莫誼願聽歌一言請說銅爐器崔嵬象南
山上枝似松柏下根據銅盤雕文各異類離婁自
相聯誰能爲此器公輸與魯班朱火然其中青煙
颺其間從風入君懷四坐莫不歡香風難久居空
令蕙草殘

送應氏

魏曹植

言宿
清時難屢得嘉會不可常天地無終極人命若朝
霜願得展嫵婉我友之朝方親昵竝集送置酒此
河陽中饋豈獨薄賓飲不盡觴愛至望苦深豈不
愧中腸山川阻且遠別促會日長願爲比翼鳥施
翮起高翔

丁督護歌二首

宋孝武帝

督護北征去相送落星墟帆檣如芒杼督護今何
渠

督護初征時儂亦惡聞許願作石尤風四面斷行

旅

九日從宋公戲馬臺集送孔令

宋謝靈運

季秋邊朔苦旅鴈違霜雪淒淒陽卉腓皎皎寒潭
絜良晨感聖心雲旗興暮節鳴葭戾朱宮蘭卮獻
時哲餞宴光有孚和樂隆所缺在宥天下理吹萬
羣方悅歸客遂海隅脫冠謝朝列弭權薄枉渚指
景待樂闋河流有急瀾浮駮無緩轍豈伊川途念
宿心愧將別彼美丘園道喟焉傷薄劣

又

宋謝瞻

風至授寒服霜降休百工繁林休揚綵密苑解華
叢巢幕無留鷺遵渚有歸鴻輕霞冠秋日迅商薄
清穹聖心眷嘉節揚鑿戾行宮四筵霑芳醴中堂
起絲桐扶光迫西汜歡餘宴有窮逝矣將歸客養
素克有終臨流怨莫從歡心歎飛蓬

送別王宣城

宋鮑照

發郢流楚思涉淇興衛情既逢青春獻復值白蘋
生廣望周千里江郊謁微明舉爵自惆悵歌管爲
佇深馨

莫愁樂

宋無名氏

聞歡下揚州相送楚山頭探手抱腰看江水斷不
流

後園餞從兄豫章

齊王儉

茲夕竟何夕念別開會軒光風轉蘭薰流月汎虛
園

別江水曹

齊謝朓

言宿
山中上芳月故人清樽賞遠山翠百重迴流映千
丈花枝聚如雲垂藤散似網別後能相思何嗟異
封壤

臨溪送別

前人

悵望南浦時徙倚北梁步葉上涼風初日隱輕霞
暮荒城迴易陰秋谿廣難渡沫泣豈徒然君子行
多露

新亭渚別范零陵節文

前人

洞庭張樂地瀟湘帝子游雲去蒼梧野水還江漢

流停驟我悵望輟櫂子夷猶心事俱已矣江上徒
離憂

送遠曲

前人

北梁辭歡宴南浦送佳人方衢控龍馬平路騁朱
輪瓊筵妙舞絕桂席羽觴陳白雲丘陵遠山川時
未因一爲清吹激潺湲傷別巾

別王丞僧孺

齊王融

首夏實清和餘春滿郊甸花樹雜爲錦月池皎如
練如何於此時別離言與宴留雜已鬱紆行舟亦

言宿
遙衍非君不見思所悲思不見

餞謝文學離夜

前人

所知共歌笑誰忍別笑歌離軒
恩黃鳥分渚夢青莎翻情結遠
旆灑淚與行波春江夜明月還
望情如何

又

齊虞炎

差池燕始飛羃歷草初輝離人
悵東顧遊子愴西歸清潮已駕
渚潏露復霑衣一乖當春聚方
掩故園扉

估客樂

齊釋寶月

有信數寄書無信心相憶莫作
瓶落井一去無消息

別范安成

梁沈約

生平少年日分手易前期及爾
同衰暮非復別離時勿言一尊
酒明日難重持夢中不識路何
以慰相思

餞謝文學離夜

前人

漢池水如帶巫山雲似蓋潏
汨背吳潮潏潏潏橫楚

瀨一望沮漳水寧思江海會以我徑寸心從君千里外

又

梁范雲

陽臺霧初解夢渚水裁淥遠山隱且見平沙斷還續分絃饒苦音別唱多悽曲爾拂後車塵我事東臯粟

送沈記室夜別

前人

桂水澄夜氛桂山清曉雲秋風兩鄉怨秋月千里分寒步寧共採霜猿行獨聞捫蘿正憶我折桂方

思君

送殷何兩記室

梁王僧儒

掩袖出南浦驅車送上征飄飄曉雲駛漾漾日潮平不肖余何惜無貲爾勿輕儻有還書便一言訪死生

新林送劉之遴

梁庾肩吾

旆轉黃山路舟纚白馬津送輪時合幘分驂各背塵常山喜臨代隴頭悲望秦欲持漢中策還以贈征人

贈王桂陽別

梁吳均

客子慘無歡送別江之干白雲方渺渺黃鳥尚關
關糾紛巫山石合杳洞庭瀾行衣侵曉露征舸犯
夜湍無因停合浦見此去珠還

相送聯句二首

梁何遜

寸陰常可惜別至倍傷神子瞻天際水予望路中
塵黯憫憫岐路側去去平生親一朝事千里流涕
向三春遜

昔共入門笑今成送別悲君還舊昌聚處爲我一頓

睂

王江乘

於今還促膝自此客江湄願子俱停駕看

我獨解維遜

高軒雖駐軫餘日久無輝以我辭鄉淚霑君送別
衣遜

相送

前人

客心已百念孤游重千里江暗雨欲來浪白風初
起

與胡興安夜別

前人

居人行轉軾客子暫維舟念此一筵笑分爲兩地

言不
言集卷之一
愁露濕寒塘草月映清淮流方抱新離恨獨守故園秋

餞謝文學離夜

梁蕭琛

執手無還顧別渚有西東荆吳眇何際煙波千里通
春筍方解籜弱柳向低風相思將安寄悵望南飛鴻

別蕭諮議

梁宗夬

別酒正參差乖情將陸離悵焉臨桂苑愍默瞻華池
輕雲流惠采時雨亂清漪眇眇追蘭徑悠悠結

芳枝眷言終何託心寄方在斯

道別席中兵

梁朱超道

數年共棲息一旦各聯翩莫論行近遠終是隔山川
長波漫不極高岫鬱相連急風亂還鳥輕寒靜暮蟬
扁舟已入浪孤帆漸逼天停車對空渚悵望轉依然

送友人上湘

梁虞羲

濡足送征人褰裳臨水路共盈一樽酒對之愁日暮
漢廣雖容舸風悲未可渡佳期難再得願但論

言宿
心故沅水日生波芳洲行隊露共知丘壑改同無
金石固

秋日別庾正員

陳徐陵

征途愁轉旆連騎慘停鑣朝氣凌疎木江風送落
潮青雀離帆遠朱鳶別路遙唯有當秋月夜夜上
河橋

隴頭送征客

陳周弘正

朝霜侵漢草流沙度隴飛一聞流水曲行住兩霑
衣

征虜亭送新安王應令

陳張正見

鳳吹臨南浦神駕餞東平亭迴漳水乘旆轉洛濱
笙地凍班輪響風嚴羽蓋輕燒田雲色暗古樹雪
花明岐路一回首流襟動睿情

別朱新侯

陳江總

送君張掖郡分悲函谷關欲知腸斷絕浮雲去不
還

別袁昌州

前人

河梁望隴頭分手路悠悠徂年若驚電別日欲成

秋黃鵠飛飛遠青山去去愁不言雲雨散更似東
西流

攜手上河梁

前人

早秋天氣涼分手關山長雲愁數處黑木落幾枝
黃鳥歸猶識路流去不知鄉秦川心斷絕何悟是
河梁

送庾羽騎抱

北齊鄭公超

舊宅青山遠歸路白雲深遲暮難爲別搖落更傷
心三城落日影迴地浮雲陰送君自有淚不假聽

猿吟

入關故人送別

北周王褒

百年餘古樹千里閭黃塵關山行就近相看成遠
人

別陸子雲

前人

解纜出南浦征權且凌晨還看分手處唯餘送別
人中流搖蓋影邊江落騎塵平湖開曙日細柳發
新春滄波不可望行雲聊共因

送周尚書弘正二首

北周庾信

言宿
交河望合浦玄菟想朱鳧共此無期別知應復幾年

離期定已促別淚轉無從惟愁郭門外應足數株松

贈別司馬幼之南聘

隋盧思道

故交忽千里輜車蒞遠盟幽人重離別握手送征
行晚霞浮極浦落景照長亭拂霧揚龍節乘風遡
鳥旌楚山百重映吳江萬仞清夏雲樓閣起秋濤
帷蓋生陸侯持寶劔終子繫長纓前修亦何遠君

其勗令名

別周記室

隋王胄

五里徘徊鶴三聲斷絕猿何言俱失路相對泣離
尊別音悽無已當歌寂不喧貧交欲有贈掩涕竟
無言

別宋常侍

隋尹式

遊人杜陵北送客漢川東無論去與住俱是一飄
蓬秋鬢含霜白衰顏倚酒紅別有相思處啼鳥雜
夜風

送蔡君却入蜀二首

隋孔德紹

金陵已去國銅梁忽背飛
失路遠相送他鄉何日歸

靈關九折險蜀道二星遙
乘查若有使希泛廣陵潮

送金敬陵入蜀

隋崔信明

金門去蜀道玉壘望長安
豈言千里遠方尋九折難
西上君飛蓋東歸我挂冠
猿聲出峽斷月彩落江寒
從今與君別花月幾新殘

送別

隋釋智才

鏡中辭舊識灞岸別新知
年來未應老祇爲數經離

賦得明月照高樓

唐楊濬

高樓一何綺素月復流明
重軒望不極餘暉攬詎盈
鏡華當牖照鉤影隔簾生
逆愁異尊酒對此難爲情

登薊丘樓送賈兵曹入都

唐陳子昂

東山宿昔意北征非我心
孤負平生願感涕下霑

襟莫登薊樓上永望燕山岑遼海方漫漫胡沙飛
且深峨眉杳如夢僊子曷由尋擊劍起嘆息白日
忽西沉聞君洛陽使因子寄南音

同工部李侍郎送司馬白雲歸天台

唐沈佺期

紫微降天僊丹地投雲藻上言華頂事中間長生
道華頂居最高大壑朝陽早長生術何妙童顏後
天老清晨朝鳳京靜夜思鴻寶馮崖飲薰氣過澗
摘靈草人非塚已荒海變田應燥昔嘗遊北郡三

霜弄溟島緒言霞上開機事塵外掃頰來迫世務
清曠未云保崎嶇待漏恩怵惕司言造軒皇重齋
拜漢武愛祈禱順風懷崆峒承露在豐鎬冷然委
輕馭復得散幽抱柱下留伯陽儲闈登四皓聞有
參同契何時一探討

送趙六貞固

唐宋之問

目斷南浦雲心醉東郊柳怨別此何時青芳來已
久與君共時物盡此盈尊酒始願今不從春風戀
攜手

言序
送丁大鳳進士赴舉呈張九齡

唐孟浩然

吾觀鷦鷯賦君負王佐才惜無金張援十上空歸
來棄置鄉園老翻飛羽翼摧故人今在位岐路莫
遲迴

送從弟落第後歸會稽 前人

疾風吹征帆倏爾向空沒千里去俄頃三江坐超
忽向來共歡娛日夕成楚越落羽更分飛誰能不
驚馬骨

送內尋廬山女道士李騰空

唐李白

君尋騰空子應到碧山家水春雲母碓風拂石楠
花若戀幽居好相邀弄紫霞

送楊山人歸嵩山 前人

我有萬古宅嵩陽玉女峯長留一片月掛在東溪
松爾去掇僊草菖蒲花紫茸歲晚或相訪青天騎
白龍

餞校書叔雲 前人

少年費白日歌笑矜朱顏不知忽已老喜見春風
還惜別且爲歡徘徊桃李間看花飲美酒聽鳥臨
晴山向晚竹林寂無人空閉關

魯郡東石門送杜二甫

前人

醉別復幾日登臨徧池臺何時石門路重有金樽
開秋波落泗水海色明徂徠飛蓬各自遠且盡手
中杯

金鄉送韋八之西京

前人

客自長安來還歸長安去狂風吹我心西掛咸陽

樹此情不可道此別何時遇望望不見君連山起
煙霧

洞庭醉後送絳州呂使君果流澧州

前人

昔別若夢中天涯忽相逢洞庭破秋月縱酒開愁
容贈劔刻玉字延平兩蛟龍送君不盡意書及鴈
迴峯

送溫處士歸黃山白鵝峯舊居

前人

黃山四千仞三十二蓮峯丹崖夾石柱菡萏金芙蓉
伊昔昇絕頂下窺天目松僊人鍊玉處羽化留
餘蹤亦聞溫伯雪獨往今相逢採秀辭五嶽攀巖
歷萬重歸休白鵝嶺渴飲丹砂井鳳吹我時來雲
車爾當整去去陵陽東行行芳桂叢迴溪十六度
碧嶂盡晴空他日還相訪乘橋躡綵虹

送崔十二遊天竺寺

前人

還聞天竺寺夢想懷東越每年海樹霜桂子落秋
月送君遊此地已屬流芳歇待我來歲行相隨浮

溟渤

同王昌齡送族弟襄歸桂陽

前人

秦地見碧草楚謠對清樽把酒爾何思鷓鴣啼南
園余欲羅浮隱猶懷明主恩躊躇紫宮戀孤負滄
洲言終然無心雲海上同飛翻相期乃不淺幽桂
有芳根

秋日魯郡堯祠亭上宴別杜補闕范侍御

前人

詩
我覺秋興逸誰云秋興悲山將落日去水與晴空
宜魯酒白玉壺送行駐金羈歇鞍憩古木解帶挂
橫枝歌鼓川上亭曲度神飈吹雲歸碧海夕鴈沒
青天時相失各萬里茫然空爾思

博平鄭太守自廬山千里相尋入江夏北市
門見訪却之武陵立馬贈別

前人

大梁貴公子氣蓋蒼梧雲若無三千客誰道信陵
君救趙復存魏英威天下聞邯鄲能屈節訪博從
毛薛夷門得隱淪而與侯生親仍要鼓刀者乃是
袖槌人好士不盡心何能保其身多君重然諾意
氣遙相託五馬入市門金鞍照城郭都忘虎竹貴
且與荷衣樂去去桃花源何時見歸軒相思無終
極腸斷朗江猿

送祖詠

唐盧象

田家宜伏臘歲晏子言歸石路雪初下荒村雞共
飛東原多煙火北澗隱寒輝滿酌野人酒倦聞隣
女機胡爲困樵采幾日罷朝衣

送別

唐王維

下馬飲君酒問君何所之君言不得意歸臥南山
陞但去莫復問白雲無盡時

齊州送祖三

前人

相逢方一笑相送還成泣祖帳口傷離荒城復愁
入天寒遠山淨日暮長河急解纜君已遙望君猶
佇立

別弟縉後登青龍寺望藍田山

前人

陌上新別離蒼茫四郊晦登高不見君故山復雲
外遠樹蔽行人長天隱秋塞心悲遊宦子何處飛
征蓋

別綦毋潛

前人

端笏明光宮歷稔朝雲陞詔刊延閣書高議平津
邸適意偶輕人虚心削繁禮盛得江左風彌王建
安體高張多絕絃截河有清濟嚴冬爽羣木伊洛
方清泚渭水冰下流潼關雪中啓荷篠幾時還塵
纓待君洗

送綦母潛落第還鄉

前人

聖代無隱者英靈盡來歸
遂令東山客不得顧採
薇既至君門遠孰云吾道非
江淮度寒食京洛縫
春衣置酒臨長道同心與我違
行當浮桂櫂未幾
拂荆扉遠樹帶行客孤城當落暉
吾謀適不用勿謂知音稀

送魏郡李太守赴任

前人

與君伯氏別又欲與君離
君行無幾日當復隔山
陂蒼茫秦川盡日落桃林塞
獨樹臨關門黃河向
天外前經洛陽陌宛洛故人稀
故人離別盡淇上
轉駮駢企予悲送遠惆悵睢陽路
古木官渡平秋
城鄴宮故想君行縣日其出從如雲
遙思魏公子
復憶李將軍

送高道弟耽歸臨淮作

前人

少年客淮泗落魄居下邳
遨遊向燕趙結客過臨
淄山東諸侯國迎送紛交馳
自爾厭遊俠閉戶方
垂帷深明戴家禮頗學毛公詩
備知經濟道高臥
陶唐時聖主詔天下賢人不得遺
公吏奉纁組安

車去茅茨君王蒼龍闕九門十二達羣公朝謁罷
冠劔下丹墀野鶴終踉蹌威鳳徒參差或問理人
術但致還山詞天書降北闕賜帛歸東菑都門謝
親故行路日透遲孤帆萬里外森漫將何之江天
海陵郡雲日淮南祠杳冥滄洲上蕩漭無人知緯
蕭或賣藥出處安能期

送友人使河源

唐賈至

送君魯郊外下車上高丘蕭條千里暮日落黃雲
秋舉酒有餘恨論邊無遠謀河源望不見旌旆去

悠悠

別王徹

唐高適

歸客自南楚悵然思北林蕭條秋風暮迴首江淮
深留連愁作歡或爲梁甫吟時輩思鵬舉他人嗟
陸沉載酒登平臺贈君千里心浮雲暗長路落日
有歸禽離別未足悲辛勤當自任吾知十年後季
子多黃金

送韓九

前人

惆悵別離日徘徊岐路前歸人望獨樹匹馬隨秋

言宿
蟬常與天下士許君兄弟賢良時正可用行矣莫徒然

送王大昌齡赴江寧

唐岑參

對酒寂不語悵然悲送君明時未得用白首徒攻
文澤國從一官滄波幾千里羣公滿天闕獨去過
淮水舊家富春渚嘗憶臥江樓自聞君欲行頻望
南徐州窮巷獨閉門寒鎗靜深屋北風吹微雪抱
被肯同宿君行到京口正是桃花時舟中饒孤興
湖上多新詩潛虬且深蟠黃鶴飛未晚惜君青雲
器努力加餐飯

送祁樂歸河東

前人

祁樂後來秀挺身出河東往來詣驪山獻賦甘泉
宮天子不召見揮鞭遂征戎前月還長安囊中金
已空有時忽乘興畫出江上峯牀頭蒼梧雲簾下
天台松忽如高堂上颯颯生清風五月火雲屯氣
燒天地紅鳥且不敢飛子行如轉蓬少華如首陽
隔河勢爭雄新月河上出清風滿關中置酒灞亭
別高歌披心胷君到故山時爲謝五老翁

別唐十五誠因寄禮部侍郎賈至

唐杜甫

九載一相逢百年能幾何復爲萬里別送子山之
阿白鶴久同林潛魚本同河未知棲集期衰老強
高歌歌罷兩悽惻六龍忽蹉跎相視髮皓白况難
駐羲和胡星墜燕地漢將仍橫戈蕭條四海內人
少豺虎多少人慎莫投多虎信所過饑有易子食
獸猶畏虞羅子負經濟才天門鬱嵯峨飄飄適東
周來往若崩波南宮吾故人白馬金盤陀雄筆映
千古見賢心靡他念子善師事歲寒守舊柯爲吾
謝賈公病肺臥江池

送陸擢

唐常建

聖代多才俊陸生何考槃南山高松樹不合空摧
殘九月湖上別北風秋雨寒殷勤歎孤鳳早食金
琅玕

送李十一尉臨溪

前人

泠泠花下琴君唱渡江吟天際一帆影預懸離別
心以言神僊尉因致瑤華音回軫撫商調越溪澄

詩宿
碧石林

古別離

唐張彪

別離無遠近事歡情亦悲不聞車輪聲後會將何
時去日忘寄書來日乖前期縱知明當返一息千
萬思

送李十四山東遊

唐韋應物

聖朝有遺逸披膽謁至尊豈是留榮寵誓將救元
元權豪非所便書奏寢禁門高歌長安酒忠憤不
可吞歛來客河洛日與靜者論濟世翻小事丹砂
駐精魂東遊無復繫梁楚多大藩高論動侯伯疎
懷脫塵喧送君都門野飲我林中樽立馬望東道
白雲滿梁園踟躕欲何贈空言是平生言

古別離二首

唐李端

水國葉黃時洞庭霜落夜行舟問商賈宿在楓林
下此地送君還茫茫似夢間後期知幾日前路轉
多山巫峽通湘浦迢迢隔雲雨天晴見海檣月落
聞津鼓人老自多愁水深難急流清宵歌一
與君桂陽別令君岳陽待後事轉差池前期日空

在木落鴈嗷嗷洞庭波浪高遠山雲似蓋極浦樹
如毫朝發能幾里暮來風又起如何兩處愁皆在
孤舟裏昨夜天月明長川寒且清菊花開欲盡
齊棗泊來生下江帆勢速五兩遙相逐欲問去時人
知投何處宿空令猿嘯時泣對湘潭竹

盧十五竹亭送姪儂歸山 唐楊衡

落葉寒擁壁清霜夜露石正是憶山時復送歸山
客殷勤一樽酒曉月當窗白

遊子吟 唐孟郊

慈母手中線遊子身上衣臨行密密縫意恐遲遲
歸難將寸草心報得三春暉

洛中晴月別殷四入關 唐劉庭芝

清洛浮橋南渡頭天晶萬里散華洲晴看石漱光
無數曉入圓潭浸不流微雲一點曙煙起南陌
憧憧遍行子欲將此意與君論復道秦關向千里

和盧明府送鄭十三還京兼寄之什

唐孟浩然

昔時風景登臨地今日衣冠送別筵醉坐自傾彭

澤酒思歸長望白雲天洞庭一葉驚秋早濩落空
嗟滯江島寄語朝廷當世人何時重見長安道

送王七尉松滋得陽臺雲 前人

君不見巫山神女作行雲霏紅沓翠曉氛氲嬋娟
流入襄王夢倏忽還隨零雨分空中飛去復飛來
朝朝暮暮下陽臺愁君此去爲僊尉便逐行雲去
不迴

送程劉二侍御兼獨孤判官赴安西幕府

唐李白

安西幕府多材雄喧喧惟道三數公繡衣貂裘明
積雪飛書走檄如飄風朝辭明主出紫宮銀鞍送
別金城空天外飛霜下蔥海火旗雲馬生光彩胡
塞塵清幾日歸漢家草綠遙相待

與諸公送陳郎將歸衡陽 前人

衡山蒼蒼入紫冥下看南極老人星迴飈吹散五
峯雪往往飛花落洞庭氣清目秀有如此郎將一
家拖金紫門前食客亂浮雲世人皆比孟嘗君江
上送行無白壁臨岐惆悵若爲分

同王昌齡送族弟襄歸桂陽

前人

爾家何在瀟湘川青莎白石長江邊
昨夢江花照江國幾枝正發東
牕前覺來欲往心悠然魂隨越
鳥飛南天秦雲連山海相接桂
水橫煙不可涉送君此去令人
愁風帆茫茫隔河洲春潭瓊草
綠可折西寄長安明月樓

別梁錕

唐李頎

梁生個儻心不羈途窮氣蓋長安兒
回頭轉眄似

鵬鷲有志飛鳴人豈知雖云四十無
祿位曾與大軍掌書記抗辭請刃誅
部曲作色論兵犯二帥一言不合龍
額侯擊劔拂衣從此弃朝朝飲酒黃
公壚脫帽露頂爭叫呼庭中擯鼻昔
嘗挂懷裏琅玕今在無時人見子多
落魄共笑狂歌非遠圖忽然遣躍紫
駟馬還是昂藏一丈夫洛陽城頭曉
霜白層冰峨峨滿川澤但聞行路吟
新詩不歎舉家無擔石莫言貧賤長
可欺覆篲成山當有時莫言富貴長
可託木槿朝看暮還落不見古時塞
上翁倚

言宿
伏由來任天作去去滄波勿復陳五湖三江愁殺
人

送康洽入京進樂府歌 前人

識子十年何不遇只愛歡游兩京路朝吟左氏嬌
女篇夜誦相如美人賦長安春物舊相宜小苑蒲
萄花滿枝柳色偏濃九華殿鶯聲醉殺五陵兒
曳裾此夜從何所中貴由來盡相許白袂春衫僊吏
贈烏皮隱几臺郎與新詩樂府唱堪愁御妓應傳
鴉鵲樓西上雖因長公主終須一見曲陵侯

送劉十 前人

三十不官亦不娶時人焉識道高下房中惟有老
氏經櫪上空餘少游馬往來嵩華與函秦放歌一
曲前山春西林獨鶴引閒步南澗飛泉清角巾前
羊上書不得意歸臥東山兀然醉諸兄相繼掌青
史第五之名齊驃騎烹葵摘果告我行落日夏雲
縱復橫聞道謝安掩口笑知君不免爲蒼生

送陳章甫 前人

四月南風大麥黃棗花未落桐葉長青山朝別暮

還見嘶馬出門思舊鄉
陳侯立身何坦蕩
虬鬚虎
眉仍大穎腹中貯書一萬卷
不肯低頭在草莽
東門酤酒飲我曹
心輕萬事如鴻毛
醉臥不知白日
暮有時空望孤雲高
長河浪頭連天黑
津吏停舟渡不得
鄭國游人未及家
洛陽行子空歎息
聞道故林相識多
罷官昨日今如何

送崔五太守入蜀

唐王維

長安廐吏來到門
朱文露網動一行
軒黃花縣西九
亦坂玉樹宮南五
丈原褒斜谷中
不容幘惟有白
雲當露冕
子午山裏杜鵑啼
嘉陵水頭行客飯
劒門忽斷蜀川開
萬井雙流滿眼來
霧中遠樹刀州
出天際
澄江巴字迴使君
年紀三十餘
少年白晢
專城居欲持畫省
郎官筆回與臨邛
父老書

送別

唐高適

昨夜離心正鬱陶
三更白露西風高
螢飛木落何
淅瀝
此時夢見西歸客
曙鐘寥亮三四聲
東鄰嘶
馬使人驚
攬衣出戶一相送
唯見歸雲縱復橫

敷水歌送竇漸入京

唐岑參

言
羅敷昔時秦氏女千載無人空處所昔時流水至
今流萬事皆逐東流去此水東流無盡期水聲還
似舊來時岸花仍自羞紅臉堤柳猶能學翠眉春
去秋來不相待水中月色長不改羅敷養蠶空耳
聞使君五馬今何在九月霜天水正寒故人西去
度征鞍水底鯉魚幸無數願君別後垂尺素

白雪歌送武判官歸京

前人

北風卷地白草折胡天八月即飛雪忽如一夜春
風來千樹萬樹梨花開散入珠簾濕羅幕狐裘不
暖錦衾薄將軍角弓不得控都護鐵衣冷難著瀚
海闌干百丈冰愁雲慘澹萬里凝中軍置酒飲歸
客胡琴琵琶與羌笛紛紛暮雪下轅門風掣紅旗
凍不翻輪臺東門送君去去時雪滿天山路山迴
路轉不見君雪上空留馬行處

天山雪歌送蕭治歸京

前人

天山雪雲常不開千峯萬嶺雪崔嵬北風夜卷赤
亭口一夜天山雪更厚能兼漢月照銀山復逐胡
風過鐵關交河城邊鳥飛絕輪臺路上馬蹄滑

言不
三十一
三十一
雷颺寒氛萬里凝
闌干陰崖千丈冰
將軍狐裘臥不
暖都護寶刀凍欲斷
正是天山雪下時
送君走馬
歸京師雪中何以贈君別
惟有青青松樹枝

送費子歸武昌

前人

漢陽歸客悲秋草
旅舍葉飛愁不掃
秋來倍憶武昌魚
夢著只在巴陵道
曾隨上將過祁連
離家十年怕在邊
劔鋒可惜虛用盡
馬蹄無事今已穿
知君開館常愛客
樽蒲百金每一擲
平生有錢將與人
江上故園空四壁
吾觀費子毛骨奇
廣眉大口

仍赤髭看君失路尚如此
人生貴賤那得知
高秋八月歸南楚
東門一壺聊出祖
路指鳳凰山北雲
衣霑鸚鵡洲邊雨
勿歎蹉跎白髮新
應須守道勿羞貧
男兒何必戀妻子
莫向江村老却人
與獨孤漸道別
長句兼呈嚴八侍御

前人

輪臺客舍春草滿
潁陽歸客腸堪斷
窮荒絕漠鳥不飛
萬磧千山夢猶懶
憐君白面一書生
讀書不卷未成名
五侯貴門脚不到
數畝山田身自耕
興

來浪跡無遠近及至辭家憶鄉信無事垂鞭信馬
頭西南幾欲窮天盡奉使三年獨未歸邊頭詞客
舊來稀借問君來得幾日到家不覺換春衣高齋
清書卷羅幕紗帽接離慵不著中酒朝眠日色高
彈碁夜半燈花落冰片高堆金錯盤滿堂凜凜五
月寒桂林蒲萄新吐蔓武城刺蜜未可餐軍中置
酒夜燭鼓錦筵紅燭月未半花門將軍善胡歌葉
河番王能漢語知爾園林壓渭濱夫人堂上泣羅
裙魚龍川北盤谿雨鳥鼠山山西洮水雲臺中嚴公
與我厚別後新詩滿人口自憐弃置天西頭因君
爲問相思否

秦箏歌送外甥蕭正歸京 前人

汝不聞秦箏聲最苦五色纏絃十三柱怨調慢聲
如欲語一曲未終日移午紅亭水木不知暑忽彈
黃鍾和白紵清風颯來雲不去聞之酒醒淚如雨
汝歸秦兮彈秦聲秦聲悲兮聊送汝

函谷關歌送劉評事使關西

前人

君不見函谷關崩城毀壁至今在樹根草蔓遮古
道空谷千年長不改寂寞無人空舊山聖朝無事
不須關白馬公孫何處去青牛老人竟不還蒼苔
白骨空滿地月與古時長相似野花不省見行人
山鳥何曾識關吏故人方乘使者車吾知郭丹却
不如請君時憶關外客行到關西多致書

青門歌送東臺張判官

前人

青門金鎖平旦開城頭日出使車回青門柳枝正
堪折路傍一日幾人別東出青門路不窮驛樓官

樹灞陵東花撲征衣看似繡雲隨去馬色疑驄胡
姬酒壚日未午絲繩玉缸酒如乳灞頭落花沒馬
蹄昨夜微雨花成泥黃鸝翅濕飛屢低關東尺書
醉懶題須臾望君不可見揚鞭飛鞚疾於箭借問
使乎何時來莫作東飛伯勞西飛燕

送孔巢父謝病歸遊江東兼呈李白

唐杜甫

巢父掉頭不肯住東將入海隨煙霧詩卷常留天
地間釣竿欲拂珊瑚樹深山大澤龍蛇遠春寒野

陰風景暮逢萊織女回雲車指點虛無引歸路自
是君身有僂骨世人那得知其故惜君只欲苦死
留富貴何如草頭露蔡侯靜者意有餘清夜置酒
臨前除罷琴惆悵月照席幾歲寄我空中書南尋
禹穴見李白道甫問訊今何如

醉歌行

前人

陸機二十作文賦汝更小年能綴文總角草書夏
神速世上兒子徒紛紛驂駟作駒已汗血鷲鳥舉
翮連青雲詞源倒流三峽水筆陣獨掃千人軍只

今年纔十六七射策君門期第一雀白穿楊葉真首
知暫蹶霜蹄未爲失偶然擢秀非難取會是排風
有毛質汝身已見唾成珠汝伯何由髮如漆春光
淡沲秦東亭渚蒲芽白水荇青風吹客衣日杲杲
樹攪離思花冥冥洒盡沙頭雙玉斝衆賓皆醉我
獨醒乃知負賤別更苦吞聲躑躅涕淚零

賦得青城山歌送楊杜二郎中赴蜀軍

唐錢起

蜀山西南千萬重僂經最說青城峯青城欽峯倚

言宿
卷之十六
三十五
空碧遠壓峨眉吞劔壁錦屏雲起易成霞玉洞花
明不知夕星臺二妙逐王師阮瑀軍書王粲詩日
落猿聲連玉笛晴來山翠傍旌旗綠蘿春月營門
近知君對酒遙相思

送遠曲

唐張籍

戲馬臺南山簇簇山邊飲酒歌別曲行人醉後起
登車席上迴樽勸僮僕青天漫漫覆長路遠遊無
家安得住願君到處自題名他日知君從此去

鸚鵡洲送王九遊江左

唐孟浩然

昔登江上黃鶴樓遙愛江中鸚鵡洲洲勢逶迤繞
碧流鴛鴦鸚鵡滿沙頭沙頭日落沙磧長金沙耀
耀動颯光舟人牽錦纜浣女結羅裳月明全見蘆
花白風起遙聞杜若香君行采采莫相忘

灞陵行送別

唐李白

送君灞陵亭灞水流浩浩上有無花之古樹下有
傷心之春草我向秦人問路岐云是王粲南登之
古道古道連綿走西京紫閣落日浮雲生正當今
夕斷腸處黃鸝愁絕不忍聽

送祝八之江東賦得浣紗石

前人

西施越溪文明艷光雲海未入吳王宮殿時浣紗
古石今猶在桃李新開暎古香菖蒲猶短出平沙
昔時紅粉照流水今日青苔覆落花君去西秦適
東越碧山清江幾超忽若到天涯思故人浣紗石
上窺明月

於宣州謝朓樓餞別校書叔雲

前人

弃我去者昨日之日不可留亂我心者今日之日
多煩憂長風萬里送秋鴈對此可以酣高樓蓬萊
文章建安骨中間小謝又清發俱懷逸興壯思飛
欲上青天覽明月抽刀斷水水更流舉杯消愁愁
更愁人生在世不稱意明朝散髮弄扁舟
單父東樓秋夜送族弟沈之秦

前人

爾從咸陽來問我何勞苦沐猴而冠不足言身騎
土牛滯東魯沈弟欲行疑弟留孤飛一鴈秦雲秋

坐來黃葉落四五北斗已挂西城樓絲桐感人絃
欲絕滿堂送君皆惜別卷簾見月清興來疑是山
陰夜中雪明日斗酒別惆悵清路塵遙望長安日
不見長安人長安宮闕九天上此地曾經爲近臣
一朝復一朝髮白心不改屈原憔悴滯江潭亭伯
流離放遼海折翮翻飛隨轉蓬聞絃虛墜下霜空
聖朝又弃青雲士他日誰憐張長公

魯郡堯祠送竇明府薄華還西京別

前人

朝策犁眉騮舉鞭力不堪強扶愁疾向何處角巾
微服堯祠南長楊掃地不見日石門噴作金沙潭
笑誇故人指絕境山光水色青於藍廟中往往來
擊鼓堯本無心爾何苦門前長跪雙石人有女如
花日歌舞銀鞍繡轂往復迴簸林蹶石鳴風雷遠
煙空翠時明滅白鷗歷亂長飛雪紅泥亭子赤闌
干碧流環轉青錦湍深沉百丈洞海底那知不有
蛟龍蟠君不見綠珠潭水流東海綠珠紅粉沉光
彩綠珠樓下花滿園今日曾無一枝在昨夜秋聲

詩宿
閭闔來洞庭木落騷人哀遂將三五少年輩登高
遠望形神開生前一笑輕九鼎魏武何悲銅雀臺
我歌白雲倚窗牖爾聞其聲但揮手長風吹月渡
海來遙勸僊人一杯酒酒終樂酣宵向分舉觴酌
堯堯可聞何不令臯繇擁篲橫八極直上青天揮
浮雲高陽小飲真瑣瑣山公酩酊何如我竹林七
子去道賒蘭亭雄筆安足誇堯祠笑殺鏡湖水至
今憔悴空荷花爾向西秦我東越暫向瀛洲訪金
闕藍田太白若可期爲余掃灑石上月

送劉昱

唐李頎

八月寒葦花秋江浪頭白北風吹五兩誰是潯陽
客鷓鴣山頭微雨晴楊州郭裏暮潮生行人夜宿
金陵渚試聽沙邊有鴈聲

送郝判官

前人

楚城木葉落夏口青山轉鴻鴈向南時君乘使者
傳楓林帶水驛夜火明山縣千里送行人秦州如
眼見江連清漢東逶迤遙望荆雲相蔽虧應問襄
陽舊風俗爲余騎馬習家池

雙黃鵠歌送別

唐王維

天路來兮雙黃鵠雲上飛兮水上宿撫翼和鳴整
羽族不得已忽分飛家在玉京朝紫微主人臨水
送將歸悲笳嘹唳垂舞衣賓欲散兮復相依幾往
返兮極浦尚徘徊兮落暉岸上火兮相迎將夜入
兮邊城鞍馬歸兮佳人散悵離憂兮獨含情

送李睢陽

前人

將置酒思悲翁使君去出城東麥漸漸雉子斑槐
陰陰到潼關騎連連
車遲遲心中悲宋又

遠周間之南淮夷東齊兒碎碎織練與素絲遊人
賈客信難持五穀前熟方可為下車閉閣君當思
天子當殿儼衣裳大官尚食陳羽觴彤庭散綬垂
明璫黃紙詔書出東廂輕紉疊綺爛生光宗室子
弟君最賢分憂當為百辟先布衣一言相為死何
况聖主恩如天鸞聲噦噦魯侯旗明年上計朝京
師須憶今日斗酒別慎勿富貴忘我為

賦得還山吟送沈四山人 唐高適

還山吟天高日暮寒山深送君還山識君心人生

老大須恣意看君解作一生事山間偃仰無不至
石泉淙淙若風雨桂花松子常滿地膏藥囊中應
有錢還山服食又長年白雲勸盡杯中物明月相
隨何處眠眠時憶問醒時事夢魂可以相周旋

送田少府貶蒼梧

前人

沉吟對遷客惆悵西南天昔爲一官未得意今向
萬里令人憐念茲斗酒成睽間停舟嘆君日將晏
遠樹應連北地春行人却羨南歸鴈丈夫窮達未
可知看君不合長數寄江山到處堪乘興楊柳青

青那足悲

西亭子送李司馬

唐岑參

高高亭子郡城西直上千尺與雲齊盤崖緣壁試
攀躋羣山向下飛鳥低使君五馬天半嘶絲繩玉
壺爲君提坐來一望無端倪紅花綠柳鶯亂啼千
家萬井連迴溪酒行未醉聞暮雞點筆操紙爲君
題爲君題惜解攜草萋萋沒馬啼

送魏升卿擢第歸東都因懷魏校書陸渾喬

潭

前人

井上梧桐雨灞亭卷秋風故人適戰勝匹馬歸山
東問君今年三十幾能使香名滿人耳君不見三
峯直上五千仞見君文章亦如此如君兄弟天下
稀雄詞健筆皆若飛將軍金印躡紫綬御史鐵冠
重繡衣喬生作尉別來久因君爲問平安否魏侯
校理復何如前日人來不得書陸渾山水佳可賞
蓬閣閒時日應往自料青雲未有期誰知白髮偏
能長壚頭青絲白玉瓶別時相顧酒如傾搖鞭舉
袂忽不見千樹萬樹空蟬鳴

送友人東歸

唐劉長卿

對酒灞亭莫相看愁自深河邊草已綠此別難爲
心關路迢迢疋馬歸垂楊寂寂數鶯飛憐君獻策
十餘載今去猶爲一布衣

餞韋兵曹

唐王勃

征驂臨野吹別袂慘江垂川霽浮煙斂山明落照
移鷹風凋晚葉蟬露泣秋枝亭臯分遠望延想間
雲涯

送杜少府之任蜀州

前人

言宿
城闕輔三秦風煙望五津與君離別意同是宦遊
人海內存知己天涯若比隣無為在岐路兒女共
霑巾

奉和別越王詩

唐劉禕之

周屏辭金殿梁驂整玉珂管聲依折柳琴韻動流
波鶴蓋分陰促龍軒別念多延襟小山路還起大
風歌

又

唐張大安

盛藩資右戚連萼重皇情離襟愴睢苑分途指鄴

城麗日開芳甸佳氣積神京何時驂駕入還見謁
承明

又

唐李敬玄

飛蓋迴蘭坂宸襟佇柏梁別館分涇渭歸路指衡
漳關山通曙色林籟徧春光帝念紆千里詞波照
五潢

送臨津房少府

唐楊炯

岐路三秋別江津萬里長煙霞駐征蓋絃奏促飛
觴階樹含斜日池風泛早涼贈言未終竟流涕忽

言
雷沾裳

送豐城王少府

前人

愁結亂如麻長天照落霞
離亭隱喬樹溝水浸平沙
左尉才何屈東關望漸賒
行看轉牛斗持此報張華

送楊處士及初卜居曲江 前人

鴈門歸去遠垂老脫袈裟
蕭寺休爲相曹溪便寄家
綠琪千歲樹黃蘗四時花
別怨應無限門前桂水斜

在兗州餞宋五之問

唐駱賓王

淮沂泗水地梁甫汶陽東
別路青驪遠離樽綠蟻空
柳寒凋密翠棠晚落疎紅
別後相思曲悽斷入琴風

送王明府參選賦得鶴

前人

振衣遊紫府飛蓋背青田
虛心恒警露孤影尚凌煙
離歌悽妙曲別操繞繁弦
在陰如可和清響會聞天

秋日送尹大赴京

前人

掛瓢余隱舜負鼎爾干湯竹葉離樽滿桃花別路
長低河耿秋色落月抱寒光素書如可嗣幽谷竚
賓行

送費六還蜀

前人

星樓望蜀道月峽指吳門萬行流別淚九折切驚
魂雪影含花落雲陰帶葉昏還愁三徑晚獨對一
清尊

餞駱四二首

唐李嶠

平生何以樂斗酒夜相逢曲中驚馬別緒醉裏失愁

容星月懸秋漢風霜入曙鐘明日臨溝水青山幾
萬重

甲第驅車入良宵秉燭遊人追竹林會酒獻菊花
秋霜吹飄無已星河漫不流重嗟歡賞地翻召別
離憂

送東萊王學士無競

唐陳子昂

寶劍千金買平生未許人懷君萬里別持贈結交
親孤松宜晚歲衆木愛芳春已矣將何道無令白
髮新

送別陶七

前人

黃鶴煙雲去清江琴酒同離帆方楚越溝水復西
東芙蓉生夏浦楊柳送春風明日相思處應對菊
花叢

送客

前人

故人洞庭去楊柳春風生相送河洲晚蒼茫別思
盈白蘋已堪把綠芷復含榮江南多桂樹歸客贈
生平

餞唐州高使君赴任

唐盧藏用

餞酒臨豐樹寒帷出魯陽蕙蘭春已晚桐栢路猶
長祖逖方城鎮安期外氏鄉從來二千石天子命
惟良

送崔融

唐杜審言

君王行出將書記遠從征祖帳連河關軍麾動洛
城旌旃朝朝氣笳吹夜邊聲坐覺煙塵埽秋風古
北平

餞唐郎中洛陽令

唐沈佺期

一臺推往妙三史佇來修應宰鳥還集辭郎雉少

留郊筵乘落景亭傳理殘秋願以絃歌暇芝蘭想
舊遊

洛州蕭司兵謁兄還赴洛成禮

前人

棠棣日光輝高襟應序歸來成鴻鴈聚去作鳳凰
飛細草承輕傳驚花慘別衣灞亭春有酒岐路惜
芬菲

送許州宋司馬赴任 唐宋之間

潁郡水東流荀陳兄弟遊偏傷茲日遠獨向聚星

州河潤在明德人康非外求當聞力爲政遙慰我
心愁

送趙司馬赴蜀州 前人

餞子西南望煙綿劍道微橋寒金鴈落林曙碧雞
飛職拜輿方遠僊成履會歸定知和氏璧遙掩玉
輪輝

送永昌蕭贊府 前人

柳變曲江頭送君函谷遊弄琴寬別意酌醴醉春
愁戀本亦何極贈言微所求莫令金谷水不入故

言宿
園流

送李侍御

前人

行李戀庭闈乘輶振彩衣南登指吳服北走出秦
畿去國夏雲斷還鄉秋鴈飛旋聞郡計入更有使
臣歸

餞湖州薛司馬

前人

別駕促嚴程離筵多故情交深季作友義重伯爲
兄鎮靜移吳俗風流在漢京會看陳仲舉從此拜
公卿

漢江宴別

前人

漢廣不分天舟移杳若僊秋虹映晚日江鶴弄晴
煙積水浮冠蓋遙風逐管絃嬉遊不可極留恨此
山川

餞李秀才赴舉

唐劉庭芝

鴻鵠振羽翻翻飛入帝鄉朝鳴集銀樹暝宿下金
塘日月天門近風煙夜路長自憐窮浦鴈歲歲不
隨陽

餞唐州高使君赴任

唐韋元旦

言
桐柏膺新命芝蘭惜舊遊鳴臯夜鶴在遷木早鶯
求傳擁淮源路罇空灞水流落花紛近遠春色引
離憂

送吏部李侍郎東歸

唐蘇頲

陌上有光輝披雲向洛畿賞來榮扈從別至惜分
飛泉溜含風急山煙帶日微茂曹今去矣人物喜
東歸

送鄭大夫惟忠從公主入蕃

唐張說

風吹遙將斷龍旗送欲還傾都邀節使傳酌緩離
顏春磧沙連海秋城月對關和戎應賞魏定遠莫
辭班

送王駿自羽林赴永昌令 前人

將星移北洛神雨避東京爲看剛腸舉邊遠追彊項
名白雲向伊闕黃葉散昆明多謝絃歌宰稀聞桴
鼓聲

送王尚一嚴疑二侍御赴司馬都督軍

前人

漢掖通沙塞邊兵護草腓將行司馬令助以鐵冠
威白露鷹初下黃塵騎欲飛明年春酒熟留酌二
星歸

岳州別姚司馬紹之制許歸侍

前人

和玉悲無已長沙官不成天從扇枕願人遂倚門
情方外懷司馬江東憶步兵問君樓泊處空山領夜
猿驚

岳州燕別潭州王熊

前人

緡雲通省閣溝水遽西東然諾心猶在容華歲不
同孤城臨楚塞遠樹入秦宮誰念三千里江潭一
老翁

送友人使夷陵

唐崔翹

猿鳴三峽裏行客舊霑裳復道從茲去思君不暫
忘開襟春葉短分手夏條長獨有幽庭桂年年空
自芳

送呂向補闕西嶽勒碑

唐徐安貞

聖作西山頌君其出使年勒碑懸日月驅傳接雲

言宿
煙寒盡函關路春歸洛水邊別離能幾許朝暮玉
墀前

送丹陽採訪

前人

郡縣分南國皇華出聖朝為憐鄉權近不道使車
遙舊俗吳三讓遺風漢六條願言除疾苦天子聽
謳謠

送王判官

前人

明月開三峽花源出五谿城池青壁裏煙火綠林
西不畏王程促唯愁僊路迷巴東下歸權莫待夜

猿啼

送廣州周判官

唐張九齡

海郡雄蠻落津亭壯越臺城隅百雉映水曲萬家
開里樹桄榔出時禽翡翠來觀風猶未盡早晚使
車迴

東湖臨泛餞王司馬

前人

南土秋雖半東湖草未黃聊乘風日好來泛芰荷
香蘭櫂無勞速菱歌不厭長勿懷京洛去難與共
清光

送宛句趙少府

前人

解巾行作吏尊酒謝離居
修竹含清景華池澹碧
虛地將幽興愜人與舊
遊疎林下紛相送多逢
長者車

送韋城李少府

前人

送子南昌尉離亭西候
春花看欲盡林鳥聽猶
新別酒青門路歸軒白
馬津相知無遠近萬里
尚爲鄰

餞竇校書得雲中辨江樹

前人

江水連天色無涯淨野
氛微明岸旁樹凌亂渚
前雲舉櫂形徐轉登艫
意漸分渺茫從此去空
復惜離羣

送越州裴參軍充使入京

唐孫逖

日落川徑寒離心苦未
安客愁西向盡鄉夢北
歸難霜果林中變秋花
水上殘明朝渡江後雲
物向南看

送趙評事攝御史監軍嶺南

前人

議獄持邦典臨戎假憲威風從閭闔去霜入洞庭
飛篁竹迎金鼓樓船引繡衣明年拜正月南斗使
星歸

送李給事歸徐州觀省 前人

列位登青瑣還鄉服彩衣共言晨省日便是晝遊
歸春水經梁宋晴山入海沂莫愁東路遠四牡正
駢駢

送靳十五侍御使蜀 前人

天使出霜臺行人不惜吏才傳車春色送離興夕陽
催驛遶巴江轉關迎劔道開西南一何幸前後二
龍來

送賀知章歸四明 唐玄宗

遺榮期入道辭老竟抽簪豈不惜賢達其如高尚
心寰中得祕要方外散幽襟獨有青門餞羣僚悵
別深

送張子容進士舉 唐孟浩然

夕曛山照滅送客出柴門惆悵野中別殷勤醉後
言茂林子偃息喬木爾飛翻無使谷風誚須令友

道存

送元公之鄂渚尋觀王張驂鸞

前人

桃花春水漲之子忽乘流峴下離蛟浦江中問鶴樓
贈君青竹杖送爾白蘋洲應是神僊子相逢汗漫遊

送洗然弟進士舉

前人

獻策金門去承歡彩服違以吾一日長念爾聚星稀
昏定須溫席寒多未授衣桂枝如已擢早逐鴈

南飛

送吳宣從事

前人

才有幕中畫而無塞上勳漢兵將滅虜王粲始從軍
旌旆邊亭去山川地脉分平生一七首感激贈夫君

早春潤州送從弟還鄉

前人

兄弟遊吳國庭闈戀楚關已多新歲感更饒白眉還
歸泛西江水離筵北固山鄉園欲有贈梅柳著先攀

送孟六歸襄陽

唐張子容

東越相逢地西亭送別津
風濤看解纜雪海見愁人
鄉在桃林岸江連楓樹春
因懷故園意意歸與孟家鄰

南陽送客

唐李白

斗酒勿爲薄寸心貴不忘
坐惜故人去偏令遊子傷
離顏愁芳草春思結垂楊
揮手再三別臨歧空斷腸

送麴十少府

前人

試發清秋興因爲吳會吟
碧雲斂海色流水折江心
我有延陵劍君無陸賈金
艱難此爲別惆悵一何深

渡荆門送別

前人

渡遠荆門外來從楚國遊
山隨平野盡江入大荒流
月下飛天鏡雲生結海樓
仍憐故鄉水萬里送行舟

送張舍人之江東

前人

張翰江東去正值秋風時
天清一鴈遠海濶孤帆

遲白日行欲暮滄波杳難期吳洲如見月千里幸
相思

送友人

前人

青山橫北郭白水遶東城此地一爲別孤蓬萬里
征浮雲遊子意落日故人情揮手自茲去蕭蕭班
馬鳴

送友人入蜀

前人

見說蠶叢路崎嶇不易行山從人面起雲傍馬頭
生芳樹籠秦棧春流遶蜀城升沉應已定不必問

君平

送李青歸華陽川

前人

伯陽僊家子容色如青春日月祕靈洞雲霞辭世
人化心養精魄隱几窅天真莫作千年別歸來城
郭新

送客歸吳

前人

江村秋雨歇酒盡一帆飛路歷波濤去家唯坐臥
歸島花開灼灼汀柳細依依別後無餘事還應掃
釣磯

送友生遊峽中

前人

風靜楊柳垂看花又別離幾年同在此今日各驅
馳峽裏聞猿叫山頭見月時慇懃一杯酒珍重歲
寒姿

杭州送裴大澤時赴廬州長史

前人

西江天柱遠東越海門深去割慈親戀行憂報國
心好風吹落日流水引長吟五月披裘者應知不
取金

送趙雲卿

前人

白玉一杯酒綠楊三月時春風餘幾日兩鬢各成
絲秉燭唯須飲投竿也未遲如逢渭水獵猶可帝
王師

江夏送張丞

前人

欲別心不忍臨行情更親酒傾無限月客醉幾重
春藉草依流水攀花贈遠人送君從此去回首泣
迷津

送王孝廉覲省

前人